

Nlir ALevitikus

Iyam inana iga nshì

(ALev 6.8-13)

¹ Nvā uMusa ka yà dāt ká Aghal Mbut te uYawe wór na ka ashe aghal va ta là á na pa,

² <<Là ôlsarila pa, nkpaktak unəmləbər va i ba ká iyam inana ũYawe te, uza á ba ká ka ashe iyam nkang wò, itam, kat te ibəl, kat te ina.

³ <<A yà pa iyam inananana va ta iga nshì ka ashe ina te, uza á na inunggwan iva yà ká mbyèt kat. Uza á ba ká ka anung Aghal Mbut, kakul na iyam inana va ta á sat ikamkam kà mpyal àYawe.

⁴ Uza i nak awó wò ka apal ishi iyam inana va ta, kang i sat iyam inana iga nshì pa dwot ikamkam kakul mmwa ishishi.

⁵ Te uza i pà iyen ina inunggwan va ta kà mpyal àYawe ka anung Aghal Mbut. Ovan aHaruna onunggwan onəm oga nshì iyam awop i yichi nchèchər, i sháng nchèr va ta ka izər nkpaktak oga ngbak atak nshì iyam awop va ka anung asal Aghal Mbut á.

⁶ Uza i mù iyam inana iga nshì pa dwot va ta kang i nyat na pa nyimənnymən.

⁷ Ovan aHaruna onunggwan onəm oga mpyal awop i mak apər ka apal atak nshì iyam awop kang i nak akun kà.

⁸ Te oza i dāt izhe inyatnyat va ta ká ishishi ká mpìpip ka apal akun ka apər va ka apal atak nshì iyam awop.

9 Unəm vạ ta i nàl iyam afu ká mbwángbwáng ká ndəng, te unəm uga mpyal awop i shì pạ kpaktak kạ apal atak nshì iyam awop, kakul iyam inana iga nshì pạ đwot va inəngnəng ichángchàng ũYawe.

10 <<Kang a yà pạ iyam inananana iga nshì pạ đwot kạ ashe iyam nkang ibəl kạ te itam te, uza á na inunggwan va yà ká mbyèt kạ á.

11 Te uza i pạ iyam nkang vạ ta kạ ngbak ngga asal mpal atak nshì iyam awop kạ mpyal àYawe, kang ovan onunggwan aHaruna onəm oga nshì iyam awop i sháng nchèchər kạ izər nkpaktak oga ngbak atak nshì iyam awop.

12 Uza i nyat iyam nkang vạ ta pạ nyimənnymən, ishíshi ká mpìpip te unəm uga mpyal awop i dət kạ apal akun kạ apər vạ kạ apal atak nshì iyam awop.

13 Unəm vạ ta i nàl iyam afu ká mbwángbwáng ká ndəng. Te unəm uga mpyal awop i shì pạ kpaktak kạ apal atak nshì iyam awop, kakul iyam inana iga nshì pạ đwot va inəngnəng ichángchàng ũYawe.

14 <<A yà pạ iyam inananana iga nshì pạ đwot ũYawe iga inyil te, uza á na ivan iləkpar kạ te ivan iruzum.

15 Unəm uga mpyal awop i ga kạ kạ atak nshì iyam awop kang i kandar ishíshi i pətar, kang i shì kạ apal atak nshì iyam awop, te i wər nchèchər kạ izər atak nshì iyam awop.

16 Uza i tur atak nrìri ká alilyang i swang kạ ashe atak mbut nchwang kạ ngbak atak nshì iyam awop kạ asal nfa alum.

¹⁷ Uza i kak kà ikwoksok i bol afufu nzəng ká nkəkan kat. Te unəm uga mpyal awop i shì kà apal atak nshì iyam awop kà apal akun vā kà anung apər, kakul iyam inana iga nshì pā dwot va inəngnəng ichángchàng ũYawe.

2

Iyam inana iga ipir ikur
(ALev 6.14-23)

¹ <<Awalang vā unəm uro ba ká iyam inana iga ipir ikur ũYawe, te nkpak iyam inana vā ta i yà mmaḱ ñyalyal. Uza i zuk mmì mpyet kà apəpal, i nak njəng nnəngnəng nchángchàng kà apəpal,

² kang i ba ká kà atak ovan aHaruna onung-gwan onəm oga nshì iyam awop. Unəm uga mpyal awop i kpak mmaḱ nlúkútlúkùt pā sūr kà awó ká mmì mpyet nzəng ká nkpaktak njəng nnəngnəng nchángchàng, kang uza i shì iyam iga nrəng ká kà apal atak nshì iyam awop, iyam inana iga nshì inəngnəng ichángchàng ũYawe.

³ Te aḃo iyam inana iga ipir ikur vā ta i yà iji aHaruna ká ovəvan onung-gwan, kakul iyéryər va ji kà ashe iyam inana iga nshì ũYawe.

⁴ <<A yā pā u yichi iyam inana iga ipir ikur ifórfòr kà ashe achər apər te, á yā ká mmaḱ nnənan, i yā nzəngkəng ngga ñyà ká ayist kat, i gwang ká mmì mpyet, kat te nzəngkəng ndátdàt va yā ká ayist kat nva mmá bəl ká mmì mpyet.

⁵ A yā pā iyam inana bu iga ipir ikur va mmá fòr kà ashe asu acham, te nkpak i yā nzəngkəng ngga ayist kat nva mmá nəm ká mmaḱ nnənan gwang ká mmì mpyet.

⁶ Nyat na pa nyimənnymən kang bu zuk mmì mpyet ka apəpal, iyam inana iga ipir ikùr.

⁷ A ya pa iyam inana bu iga ipir ikùr mmá fòr ka ashe asu te, á ya ká mmaḱ ñyalyal ká mmì mpyet.

⁸ Awalang va bu ba ká iyam inana iga ipir ikùr ũYawe iva mmá nəm ká iyam va ta te, yichi ũnəm uga mpyal awop kang uza i ga ká ka atak nshì iyam awop.

⁹ Unəm uga mpyal awop i tur iyam inana iga nrəng ká ka ashe iyam inana iga ipir ikùr, kang uza i shì ka apal atak nshì iyam awop, iyam inana iga nshì inéngnəng ichángchàng ũYawe.

¹⁰ Te abo iyam inana iga ipir ikùr va ta i ya iji aHaruna ká ovəvan onungguan, kakul iyéryər va ji ka ashe iyam inana iga nshì ũYawe.

¹¹ <<Nkpaktak iyam inana iga ipir ikùr va bu yichi ũYawe te mí nəm ká ayist kaṭ, kakul bu ya ká nshì iyam iga ayist kaṭ, kaṭ te irizhe wa iyam inana iga nshì ũYawe kaṭ.

¹² Bu yichi oza yichi ũYawe wa iyam inana iga ñyál nggəshi, kang mí ya ká ñyichi oza ka apal atak nshì iyam awop wa iyam inéngnəng ichángchàng kaṭ.

¹³ Mí nak mmàn nza iyam inana bu nggo iga ipir ikùr. Kang wa kong ká nnak mmàn ngga nsar nnap-nlà bu ká Inan, ka ashe iyam inana bu iga ipir ikùr ká nza iyam inana bu nggo va bu yichi te, nak mmàn kà.*

¹⁴ <<A ya pa u yichi iyam inana iga ipir ikùr ñyál nggəshi ũYawe te, nkpak bu yichi ishi ikùr

* **2:13 2.13** Kakul mmàn pa te ká nnyám ipir nsar nnap va Inan yar ká unəm mbyet mbyet.

izhakan ipèrkènpèrkèn, iva mmá wàng ká apèr, kang mmá kpèkpà.

¹⁵ Te nkpak bu nak mmì mpyet ká njəng nnéngnəng nchángchàng ká apəpal, kakul iyam inana iga ipir ikùr.

¹⁶ Unəm uga mpyal awop i shì ká ashe ikùr ipèrkènpèrkèn iyam inana iga nrəng ká, ká mmì mpyet ká nkpaktak njəng nnéngnəng nchángchàng iyam inana iga nshì ũYawe.

3

Iyam inana iga nggwang ishi

(aLev 7.11-25)

¹ <<A yà pà uza ká òyichi nləfər wò ngga ntəm ikángkáng ká ashe ina, mo te ìnunggwan kat te ichar nggo, te uza á yichi iva yà ká ndaktak kat.

² Uza i nak awó wò ká apal ishi iyam inana wò kang ì pà ká anung asal Aghal Mbut. Te ovan áHaruna onunggwan onəm oga nshì iyam awop i yichi nchèchèr, i sháng nchèr va ta ká izər nkpaktak oga ngbak atak nshì iyam awop.

³ Uza i yichi ká ashe nləfər iyam ipápà iga ikángkáng iyam inana iga nshì ũYawe. Mpip va gún iyam afu ká nkpaktak mpip va ká apal iyam afu,

⁴ ká arùsòk aga aparəm ká mpip va ká apal oza ká atak adək, ká mpip ngga apal anì nzəng ká oga arùsòk uza i zèp.

⁵ Ovan aHaruna onunggwan i shì ká atak nshì iyam awop ká iyam inana ishíshì va ká apal akun va ká apal apər, iyam inana iga nshì inéngnəng ichángchàng ũYawe.

⁶ <<A yà pà nləfər iyām inananana iga ntəm ikángkáng ũYawe kà ashe iyām nkəkang, uza i yichi inungwan kat te ìchar iva yà ká ndaktak kat.

⁷ A yà pà uza kà òyichi iyen inagam iyām inana wò, te uza i yichi kà mpyal àYawe.

⁸ Uza i nak awó wò kà apal ishi iyām inana wò kang i pà kà mpyal Aghal Mbut. Te ovan aHaruna onungwan onəm oga nshì iyām awop i sháng nchər va ta kà ngbak oga atak nshì iyām awop.

⁹ Te kà ashe nləfər iyām inana iga ntəm ikángkáng, uza i yichi ngbak nro wa iyām inana iga nshì ũYawe. Mpìpip, nkpaktak mpip aswal uza i tutur. Mpip va gún iyām afu, kà nkpaktak mpip va gún iyām afu,

¹⁰ ká arùsòk aga aparəm, ká mpip va kà apal oza kà atak adək, ká mpip ngga apal anì nzəng ká oga arùsòk uza i zəp.

¹¹ Te unəm uga mpyal awop i shì kà apal atak nshì iyām awop wa iyām-nrì, iyām inana iga nshì ũYawe.

¹² <<A yà pà uza kà òyichi iyām inana wò ìbəl, te uza á yichi kà mpyal àYawe.

¹³ Uza i nak awó wò kà apal ishi iyām inana wò kang i pà kà anung asal Aghal Mbut. Te ovan aHaruna onungwan onəm oga nshì iyām awop i yichi nchèchər, i sháng nchər va ta kà izər nkpaktak oga ngbak atak nshì iyām awop.

¹⁴ Uza i yichi kà ashe iyəyām inana, ngbak nro wa iyām inana iga nshì ũYawe, mpip va gún oga iyām afu, kà nkpaktak mpip va kà apal oga iyām afu,

¹⁵ ká arùsòk aga aparəm, ká mpip va kà apal

oza ka atak adək, ká mpip ngga apal anì nzəng ká oga arùsòk uza i zəp.

¹⁶ Te unəm uga mpyal awop i shì oza ka apal atak nshì iyam awop wa iyam-nrì, iyam inana iga nshì inəngnəng ichángchàng. Nkpaktak mpip nji aYawe.

¹⁷ Iyam va ta nnap mpakpak va təm chit mbyet mbyet kakul oga nlwàk wó, ká nkpaktak atak ntəm wó. Nkpaktak mpip ká nchər, ó ri kat.>>

4

Iyam inana kakul nnap mbángbàng (ALev 6.25-30)

¹ UYawe là ûMusa pa,

² << Là ôlsarila, <Awalang va unəm uro nəm nnap mbángbàng ká avyal kat ka ashe nkpaktak nnap mpakpak àYawe nva mmá dang oza kà nnənəm, kang uza nəm.

³ << <A yà pa unəm uga mpyal awop ugorgor nəm nnap mbángbàng, kang à ba ká mpat ka apal onəm, te uza i yichi ina inunggwan ûYawe ìva yà ká ndaktak kat kakul iyam inana nnap mbángbàng.

⁴ Uza i ba ká ina inunggwan ka anung Aghal Mbut kà mpyal aYawe, kang uza i nak awó wò ka apal ishi ina inunggwan va ta, te i pa kà mpyal àYawe.

⁵ Te unəm uga mpyal awop ugorgor i pá nchər ina inunggwan va ta uza i ba ká ka ashe Aghal Mbut.

⁶ Uza i pá ifang wò ka ashe nchər va kang i sháng nvàng pa nfangshat kà mpyal àYawe ká mpyal atani aga Atak Ayéryər.

⁷ Unəm uga mpyal awop i bəl nchər nro ka izər oga nggùnggùng ngga atak nshì iyām awop anəngnəng achángchàng vạ kạ mpyal àYawe kạ ashe Aghal Mbut. Nkpaktak abo nchər ìna ìnunggwan vạ ta uza i wàr kạ avəng ashar atak nshì iyām inana iga nshì vạ kạ anung Aghal Mbut.

⁸ Te nkpaktak mpip ìna ìnunggwan iyām inana nnap mbángbàng uza i zèp. Mpip vạ gún iyām afu, kạ nkpaktak mpip vạ kạ apal oga iyām afu,

⁹ kạ arùsòk aga aparəm kạ mpip vạ kạ apal oza kạ atak adək, kạ mpip ngga apal anì nzəng kạ oga arùsòk uza i zèp.

¹⁰ Wa nva mí tutur mpip kạ ashe ìna ìnunggwan nləfər iyām inana iga ntəm ikánkáng, te unəm uga mpyal awop i shì oza kạ apal atak nshì iyām awop aga iyām inana iga nshì.

¹¹ Kang awá ìna ìnunggwan vạ ta, kạ nkpaktak ìzhizhe, kạ ishíshi, kạ mbwángbwángbwangbwang, kạ iyām afúfu, kạ ìbənggangbənggang,

¹² uza i fa kạ nkpaktak abo ìna ìnunggwan vạ ta kạ nsəm apak kạ atak anənən, kạ atak mbut nchwang kang uza i shì kạ apal anung akun apər. Mí shì kạ atak mbut nchwang.

¹³ << <A yà pạ nkpaktak mbut oIsarila nəm mpat kạ avyal kat, kang nnap vạ ta tar achwang nggatək kat, te oza nəm iyām vạ mmá dang oza kạ nnənəm kạ ashe nnap mpakpak aYawe nro, te oza i yà kạ mpat.

¹⁴ Awalang vạ nnap mbángbàng vạ oza nəm kạ apal nnap mpakpak fa mbáng, te mbut i yichi ìna ìnunggwan wa iyām inana nnap mbángbàng, oza i ba kạ kạ mpyal Aghal Mbut.

15 Onəmgbak mbut va ta i nak awó oza ka apal ishi ina inungwan va ta ka mpyal àYawe, kang i pa ina inungwan va ta ka mpyal àYawe.

16 Te unəm uga mpyal awop ugorgor i ba ká nchər ina inungwan va ta nro ka ashe Aghal Mbut.

17 Uza i pa ifang wò ka ashe nchər va kang i sháng nvəng pa nfangshat ka mpyal àYawe ka mpyal atani.

18 Uza i bəl nchər nro ka izər oga nggùnggúng ngga atak nshì iyəm awop va ka mpyal àYawe ka ashe Aghal Mbut. Nkpaktak abo nchər ina inungwan va ta uza i wər ka avəng ashar atak nshì iyəm inana iga nshì va ka anung Aghal Mbut.

19 Uza i zəp nkpaktak mpipip, i shì ka apal atak nshì iyəm awop.

20 Unəm uga mpyal awop i nəm ká ina inungwan va ta wa nva uza nəm ká ina inungwan iga nnap mbángbang. Uza i nəm mmwa ishi kakul oza, te mí yar nnap mbángbang ôza.

21 Te uza i fa ká ina inungwan va ta ka nsəm apak, kang i shì wa nva uza shì ina inungwan igəshi. Iyəm inana nnap mbángbang nggatək.

22 << <A yà pa unəm uga mpyal nəm iyəm ibángbang ká avyal kat, uza nəm iyəm pa izəng va mmá dang ka ashe nnap mpakpak àYawe Inənan, te uza i yà ká mpat.

23 Unəm uro a nyám nnap mbángbangbangbang á na te uza i ba ká iyəm inana wò ibəl inungwan, iva yà ká mbyèt kat.

24 Uza i nak awó wò ka apal ishi ibəl va ta, kang

i pà ná kà atak va mí pà iyam inana iga nshì kà, kà mpyal àYawe. Iyam inana iga nnap mbángbang.

25 Te unəm uga mpyal awop i pá ìfang kà ashe nchèr iyam inana nnap mbángbang i bəl ñggùnggúng ngga atak nshì iyam awop. Abo nchèchər te uza i tar kà avəng atak nshì iyam inana iga nshì.

26 Nkpaktak mpìpip uza i shì kà atak nshì iyam awop, wa mpip nləfər iyam inana iga ntəm ikánkáng. Te unəm uga mpyal awop i mwa ishíshi ká, kang mí yar nnap mbángbangbang á na.

27 << <A yà pà unəm uga nkun uro kà ashe mbut nəm nnap mbángbang ká avyal kat kà ashe oga nnap mpakpak aYawe nro nva mmá dang nnənəm dang, kang à yà ká mpat,

28 kang mmá nyám mpəpat á na, te uza i ba ká iyam inana wò ìbəl ìchar iva yà ká ndaktak kat, kakul nnap mbángbang va uza nəm.

29 Uza i nak awó wò kà apal ishi iyam inana nnap mbángbang kang i pà kà atak aga nshì iyam awop.

30 Te unəm uga mpyal awop i pá ìfang kà ashe nchèr i bəl ñggùnggúng ngga atak nshì iyam awop. Abo nchèchər te uza i wàr kà avəng ashar atak nshì iyam inana iga nshì.

31 Kà nvəvəng te unəm uga mpyal awop i zèp nkpaktak mpìpip, wa nva uza zèp ngga iyam inana iga ntəm ikánkáng, i shì kà apal atak nshì iyam awop wa iyam inəngnəng ichángchàng ũYawe. Unəm uga mpyal awop i nəm mmwa ishi á na ká, te mí yar á na.

³² << <A yà pà uza ba ká ìtam iyam inana nnap mbángbang, te uza á ba ká ìchar ìva yà ká ndaktak kat.

³³ Uza i nak awó wò ka apal ishi iyam inana nnap mbángbang, kang uza i pà kakul nnap mbángbang, ka atak mpà iyam inana iga nshì.

³⁴ Te unəm uga mpyal awop i pá ifang ka ashe nchər iyam inana nnap mbángbang i bəl nggunggung ngga atak nshì iyam awop. Abo nchəchər te uza i wər ka avəng ashar atak nshì iyam inana iga nshì.

³⁵ Uza i zèp nkpaktak mpìpip wa nva mí zèp mpip ìtam nləfər ngga ntəm ikánkáng, te unəm uga mpyal awop i shì oza ka apal atak nshì iyam awop, iyam inana iga nshì ũYawe. Unəm uga mpyal awop i nəm mmwa ishi á na ká, kakul nnap mbángbangbangbang va uza nəm, te mí yar á na.

5

Iga iyam inana kakul nnap mbángbang (ALev 7.1-7)

¹ ŨYawe là ònəm kà dí pà, <<A yà pà unəm uro yang nlà nnàp ka apal nnap mbángbang va unəm uro nəm va uza yiya, kat te uza nyinyi kang uza là fa mbáng kat, te uza nəm nnap mbángbang.

² Kat te a yà pà unəm uro dok iyam iro iga adak, akúm nza ìzhe iga anyin nggo iga adak, kat te akúm iyam nkang iga adak, kat te akúm iyam iga nkpàng ká afu iga adak, nzəng ká nnyinyi kat, te uza ká adak kang uza pat chit.

³ Kaṭ te a yà pà uza dok adak ánəmləbər, ká nza apir iyam iga adak nggo va i nak uza i yà ká adak nzəng ká nnyinyi kaṭ, kang kà nvəvang uza nyi, te uza ká mpat.

⁴ Kaṭ te a yà pà unəm sóng anung ka ashe nghan ka apal nnəm iyam inənan, kaṭ te inga, nkpaktak iyam va unəmləbər là ká nghan ka ashe nsóng anung nzəng ká nnyinyi kaṭ, kang kà nvəngva uza nyi te, uza i yà ká mpat.

⁵ Awalang va unəm yà ká mpat ka ashe izəngtəng oga iyam va ta, uza i pwa nnap mbəngbəng va uza nəm.

⁶ Uza i ba ká iyam inana mpat wò ũYawe kakul nnap mbəngbəng va uza nəm, itam ichar kaṭ te ibəl kakul iyam inana nnap mbəngbəng. Te unəm uga mpyal awop i yichi iyam inana iga mmwa ishi ka anunung, kakul nnap mbəngbəngbəngbəng.

⁷ <<Kang a yà pà uza yà ká ikam iga nna itam kaṭ, te uza i ba ká ivan iləkpar pà iparəm kaṭ te ivan iruzum pà iparəm ũYawe, kakul mpat va uza nəm. İro kakul iyam inana nnap mbəngbəng kang İro kakul iyam inana iga nshì.

⁸ Uza i ba ká oza ka atak ánəm uga mpyal awop, uva i yichi İro iyam inana nnap mbəngbəng nggəshi. Uza i kandar İshishak nzəng ká mpətarpətar kaṭ.

⁹ Te uza i shəng nchər nro ngga iyam inana nnap mbəngbəng kə ngbak atak nshì iyam awop, kang abo nchər te mí wər ka avəng ashar atak nshì iyam awop, iyam inana nnap mbəngbəng.

¹⁰ Uza i yichi ipəpar iyam inana iga nshì wa

nva nnap mpakpak là. Te unəm uga mpyal awop i nəm mmwa ishi ka anunung kakul nnap mbángbang va uza nəm, te mí yar á na.

¹¹ <<A yà pa iləkpər pa iparəm kat te iruzum pa iparəm mat na mat kà nná te, uza á ba ká mmak ñyalyal ikpang pa izəng kakul iyam inana nnap mbángbang. Uza i zuk mmì mpyet ká njəng nnəngnəng nchángchàng ka apəpal kat, kakul iyam inana iga nnap mbángbang.

¹² Uza i ba ká ûnəm uga mpyal awop, te unəm uga mpyal awop i kpak ka ashishe ka awó pa súr wa iyam inana iga nrəng ká. Te uza i shì ka apal atak nshì iyam awop wa iyam inana iga nshì ûYawe. Iyam va ta iyam inana iga nnap mbángbang.

¹³ Ka asal va ta unəm uga mpyal awop i nəm mmwa ishi kakul nnap mbángbang va uza nəm ka ashe izəngtəng oga iyam va ta, te mí yar á na. Abo mməmak i yà nji ànəm uga mpyal awop, wa nva ka iyam inana ipir ikùr.>>

¹⁴ UYawe là nnàp ká uMusa pa,

¹⁵ <<A yà pa unəm uro nəm nnap mbángbang ká avyal kat ka apal iyam iyéryər aYawe iro, te uza i ba ká iyam inana iga mpat ûYawe, inagam va yà ká ndaktak kat ka ashe iyam nkang, iva məmàl ká mbwai ashekel. Kang i məmàl kpa ká ashekel aga Atak Ayéryər kakul mpat.

¹⁶ Nnap mbángbang va uza nəm ka ashe iyam iyéryər, te uza i le ká uzəng ka apal átukun ka apəpal, kang i na unəm uga mpyal awop. Te unəm uga mpyal awop i nəm mmwa ishi ká

ka_kukul ka_inagam iga iyam inana mpat, te mi yar a na.

¹⁷ <<A ya pa unem uro nem nnap mbangbang ka avyal kat ka ashe oga nnap mpakpak aYawe nva mma dang oza ka nnenem te uza i ya ka mpat kap ka nva uza nyi kat, te uza i yar nsur mpat wo.

¹⁸ Uza i ba ka_inagam va ya ka ndaktak kat ka ashe iyam nkang, kang a memal kakul mpat. Te unem uga mpyal awop i nem mmwa ishi a na ka kakul mpat va uza nem ka ashe nnyi kat a, te mi yar a na.

¹⁹ Iyam inana mpat, kakul mmwa ishi unem uga mpat ka mpyal aYawe.>>

6

¹ UYawe la uMusa pa,

² <<A ya pa unem uro nem nnap mbangbang uYawe ka atak nlam uwan wo ka ashe nnap iyam iro va mma na a na pa a kpan a nak ishi ka, kat te iyam iro va mma vyat, kat te a mwar uwanwo,

³ kat te vyok iyam iro va lar kang a nap akwam ka apopal, kat te song anung aga akwam ka apal iyam iro va unemlæber i nem nnap mbangbang ka atak oza,

⁴ Awalang va uza nem nnap mbangbang kang a ya ka mpat, te uza i le ka iyam va uza vyat, kat te ivengva uza mwar, kat te iyam va mma na a na pa a kpan a nak ishi ka, kat te iyam va lar kang uza vyok,

⁵ kat te ka ashe nza iyam nggo va uza song anung ka apopal ka akwam te uza i le ka. Te uza i le ka pa chat chat kang i nak ikak ka uzeng ka apal

átukun ûnənəm, kang i na á na kà ìlum va_ uza_ nyi mpat wò.

⁶ Uza_ i ba ká iyam inana mpat wò ûYawe, ìnagam va yà ká mbyèt kat_ kà ashe iyam nkang, iva á məmàl kakul mpat ûnəm uga mpyal awop.

⁷ Unəm uga mpyal awop i nəm mmwa ishi á na ká kà mpyal àYawe, kang mí yar á na kà apal iyam iro kà ashe iva uza_ nəm mpat kà.>>

Iyam inana iga nshì
(ALev 1.1-7)

⁸ UYawe là ûMusa pa,

⁹ <<Là ûHaruna ká ovəvan onungwan pa, nnap mpakpak iyam inana iga nshì nnà ta. Iyam inana iga nshì i təm kà ìdīmđīm atak nshì iyam awop nkpktak ìzwam atak i tən kà, kang apər aga atak nshì iyam awop i yà kà nrí kà apəpal.

¹⁰ Unəm uga mpyal awop i pá ìlukwan alinin wò ìwángwang, ká iga alinin iga ashe ìbwakan kà ìzər wò, te uza_ i wur nchwang ngga iyam inana ishishì va apər shì kà apal atak nshì iyam awop, uza_ i nak kà ngbak atak nshì iyam awop.

¹¹ Te uza_ i zèp oga ilukwan wò i mwàk ilukwan ikák, kang i fa ká nchwang kà nsəm apak kà atak mbubut anənan.

¹² Apər va_ kà apal atak nshì iyam awop á pak nsal kang á kú kat. Kang nza_ ìpin nggo te unəm uga mpyal awop i gwanggwang akún kang i dàt iyam inana iga nshì kà. Uza_ á shì mpip iyam inana iga ntəm ikánkáng kà apəpal.

¹³ Apər va_ kà apal atak nshì iyam awop á pak nsal pa_ dəkər kang á kú kat.

Iyaṃ inana ìpir ìkùr
(ALev 2.1-16)

¹⁴ <<Nnap mpakpak ngga iyaṃ inana ìpir ìkùr nnà ta. Ovan aHaruna onungguan i yichi kà mpyal àYawe, kà mpyal atak nshì iyaṃ awop.

¹⁵ Uzəngtəng kà ashe onəm oga mpyal awop i kpaḱ mmaḱ nlúkútlúkùt pà sùr kà awó kà mmì mpyet nzəng kà nkpaktak njəng nnəngnəng nchángchàng, kang uza i shì iyaṃ iga nrəng kà kà apal atak nshì iyaṃ awop, iyaṃ inana iga nshì inəngnəng ichángchàng ûYawe.

¹⁶ UHaruna kà ovan wò onungguan i ri abuḃo. Mí ri kà nzəngkəng ngga nyà kà ayist kaṭ kà Atak Ayéryər, oza i ri kà ashe agəlan Aghal Mbut.

¹⁷ Mí fòr kà ayist kaṭ, n na ôza chit təm nji oza kà ashe iyaṃ inana mi iga nshì. Iyéryər va ji, wa iyaṃ inana nnap mbángbàng kà iyaṃ inana mpat.

¹⁸ Nza unungguan nggo kà ashe ovan aHaruna i riri kà ashe iyaṃ inana iga nshì ûYawe. Á təm chit nnap mpakpak kakul oga nlwàk wó mbyet mbyet. Nkpaktak iyaṃ va i dok oga iyaṃ inana va ta te i yà iyéryər.>>

¹⁹ UYawe là ûMusa pa,

²⁰ <<Iyaṃ inana va ta uHaruna kà ovan wò onungguan i yichi ûYawe kà ilum va mí gòr na kà. Uza i ba kà ikpang pà izəng kà ashe agbapchi iga mmaḱ nyalyal wa iyaṃ inana ìpir ìkùr pà đəkər, mí kap kà ishimshe abuḃo kà ìpin kang abuḃo kà arurəng.

²¹ Kál kà mmì mpyet te fòr kà ashe asu acham. Nyat na pà nyimənnymən wa iyaṃ inana

ìpir ìkùr, kang bù yichi iyam inana inéngnèng ichángchàng ùYawe.

²² Unəm uga mpyal awop uva mmá gòr ka ashe ovan aHaruna pa á yar atak nsəsət, te uwà i yichi iyam inana va ta ùYawe wa nnap mpakpak mbyet mbyet. Mí shì iyam inana va ta pa chatchat.

²³ Nza iyam inana ìpir ìkùr nggo va kakul anəm uga mpyal awop te, mí shì pa chatchat. Mí ri kaṭ.>>

Iyam inana nnap mbángbàng
(ALev 4.1-35)

²⁴ UYawe là ùMusa pa,

²⁵ <<Là ùHaruna ká ovan wò onungwan pa, nnap mpakpak ngga iyam inana nnap mbángbàng nnà ta. Mí pà iyam inana nnap mbángbàng kà mpyal àYawe ka atak va mí pà iyam inana nnap mbángbàng kà. Nnà iyéryər va ji pa kpaktak.

²⁶ Unəm uga mpyal awop va yichi iyam inana va ta wa iyam inana nnap mbángbàng te, uza i ri ka Atak Ayéryər ka ashe agəlan Aghal Mbut.

²⁷ Iyam va dok izhizhe te i yà iyéryər, kang a yà pa nchèchər sháng ka apal ilukwan, te uza á nàl ilukwan va ta ka Atak Ayéryər.

²⁸ Mí chwan ngbət amè va mmá pék iyam inana nnap mbángbàng ka ashishe, nnyi te a yà pa mmá pék ka ashe ngbət acham arəzang te mí gbàk kang mí zwaktak kà ndəng.

²⁹ Nza uyen unungwan nggo ka ashe onəm oga nshì iyam awop i riri. Iyéryər va ji.

³⁰ Iyām inana nnap mbángbàng va mí ɓa ká nchèchər ká ashe Aghal Mbut kakul nnəm mmwa ishi ká Atak Ayéryər te, mí ri kat, nkpak mí shì ká apər.

7

Iyām inana iga mpat

(ALev 5.1-19; 6.1-7)

¹ <<Nnap mpakpak ngga iyām inana iga mpat nnà ta. Iyéryər va ji.

² Mí pà iyām inana iga mpat ká atak va mí pà iyām inana iga nshì ká, kang mí sháng nchèchər ká oga ngbak atak nshì iyām awop.

³ Nkpaktak mpìpip mí yichi, mpip aswal ká mpip va gún oga iyām afu,

⁴ ká arùsòk aga aparəm ká mpip va ká apal oza ká atak adək, ká mpip ngga apal anì nzəng ká oga arùsòk uza i zəp.

⁵ Unəm uga mpyal awop i shì oza ká apal atak nshì iyām wa iyām inana iga nshì ũYawe. Iyām va ta iyām inana mpat.

⁶ Nza uyen ununggwan nggo ká ashe onəm oga nshì iyām awop i riri. Mí ri ká Atak Ayéryər, iyéryər va ji.

⁷ Iyām inana iga mpat wa iyām inana nnap mbángbàng, nnap mpakpak nzəngtəng ká apal oza. İzhe va ta i yà ìjì anəm uga mpyal awop va nəm mmwa ishi ká.

⁸ Unəm uga mpyal awop va ká ñyichi iyām inana ìjì ánəm uro iga nshì, te awá iyām inana va uza yichi i yà ajini.

⁹ Nza iyam inana ipir ikur nggo va mmá wàng ka ashe achər apər aga nwàng iyam, ká nkpahtak iyam va mmá fər ka ashe asu kat te ka ashe asu acham, i yà aji anəm uga mpyal awop va yichi iyam inana va ta.

¹⁰ Kang nza iyam inana ipir ikur nggo, iva mmá kál ká mmì kat te mpəsək, te i yà iji ovan aHaruna onungwan.

¹¹ <<Oga iyam va ta nnap mpakpak nləfər iyam inana iga ntəm ikangkang va unəm i yichi ūYawe.

¹² A yà pa uza yichi chit kakul adəngchi wò, te uza á yichi nzəng ká nzəngkəng ngga nyà ká ayist kat gwang ká mmì, ká nzəngkəng ndátdát ngga nyà ká ayist kat, kang ká awoina va mmá bít ká mmak nyalyal mmá bəl ká mmì.

¹³ Nzəng ká nləfər iyam inana iga ntəm ikangkang wò, uza i yichi iyam inana iga adəngchi ká nzəngkəng ngga ayist.

¹⁴ Ka ashe nza iyam inana nggo te uza i yichi nzəngkəng ūYawe pa nzəng. I yà nji anəm uga mpyal awop va sháng nchər nləfər ngga ntəm ikangkang.

¹⁵ İzhe nləfər ngga adəngchidəngchi kakul ntəm ikangkang mí ri nda va uza yichi ká. Uza i re abubo i chu ipín kat.

¹⁶ A yà pa uza yichi nləfər wò ngga nyar nsar nnap-nla kat te ngga ndòm igwak, te mí ri nda va uza yichi ká, kang abubo va re te mí riri ká ipín ikpakpak.

¹⁷ Nnyi te abo iyam va re ka ashe izhe nləfər va ta te, mí shi ka apal nra ngga nshatding.

¹⁸ A yà pa mmá ri izhe iro ka ashe iyam inana

iga ntəm ikánkángkankang ka apal nra ngga nshatding te, unəm va yichi te mí kām na kaṭ, kang iyəyam i yà ikāmkaṃ kaṭ. I taḷ iyaṃ iga ajan, kang unəm va ri ka ashishe te uza i yar nsusur.

19 <<Kang wa ri izhe va dok iyaṃ iga adak kaṭ, ka ador nva ta te wa shì á le ká apər. İro va yà ká adak kaṭ te unəm uga ñyà ká adak kaṭ i riri.

20 Unəm va ri izhe ka ashe nləfər iyaṃ inana iga ntəm ikánkáng va iji aYawe ka awalang va uza ká adak te, mí fa ká na ka ashe onənəm.

21 A yà pa unəm dok iyaṃ iga adak, mo te unəmləbər uga adak, kaṭ te izhe iga adak, kaṭ te abo iyaṃ iga ajan, kang à ri nləfər iyaṃ inana iga ntəm ikánkáng iji aYawe, te mí fa ká na ka ashe onənəm.>>

22 UYawe là ûMusa pa,

23 <<Là ôlsarila pa, ó yà ká nrí mpip ina ìnungwan, kaṭ te ìnagam, kaṭ te ìbəl kaṭ.

24 Kang mpip iyaṃ nkang va á kúkú kaṭ te izhe iga anyin à gbaḷ te, mí nəm inok nəm ká kà nza asaḷ awú nggo, nnyi te nkpak ó ri kaṭ.

25 Unəm va kpaktak ri mpip iyaṃ nkang iyaṃ inana iga nshì va uza yichi ûYawe te, mí fa ká na ka ashe onənəm.

26 Atak va pa kpaktak ó təm kà te, ó yà ká nrí nchər ìnyil kaṭ te iyaṃ nkang kaṭ.

27 Unəm va kpaktak ri nchər nro te, mí fa ká na ka ashe onənəm.>>

28 UYawe là ûMusa pa,

29 <<Là ôlsarila pa, unəm va kà ñyichi nləfər iyaṃ inana iga ntəm ikánkáng ûYawe te, uza á ba

ká ka ashe nləfər iyam inana iga ntəm ikánkáng wò.

³⁰ Ká awúwo uza i ba ká oga iyam inana iga nshì ûYawe. Uza i ba ká mpip nzəng ká afòr, kakul á yà afor iyam inana iga ñyege ká mpyal àYawe.

³¹ Unəm uga mpyal awop i shì mpìpip ka apal atak nshì iyam awop, kang afufor i yà aji aHaruna ká ovəvan onungwan.

³² Bu na ìsong iga awó ari ûnəm uga mpyal awop ka ashe nləfər iyam ipápà iga ntəm ikánkáng bu, wa iyam ibutbut.

³³ Uyen aHaruna va yichi nchər ká mpip iyam inana ipápà te, ìsong iga awó ari i yà ijini.

³⁴ Ka ashe nləfər ngga ntəm ikánkáng oIsarila, n yar afòr chit ava mmá yichi á mi ká ìsong iga awó ari ka ashe iyam inana ibutbut. N na oza ûHaruna unəm uga mpyal awop ká ovan wò onungwan. Iyam va ta nnap mpakpak mbyet mbyet kakul nlwàk ngga mba.

³⁵ Iyam va ta ngbak iyam inana iga nshì ûYawe va mmá na ûHaruna ká ovəvan onungwan ká nra va mmá gòr oza wa onəm oga nshì iyam awop.

³⁶ UYawe nak pa oIsarila á na iyam va ta ôza á bàn ká nra va mmá gòr oza ká. Nnap nnəm va ta kakul oga nlwàk oIsarila mbyet mbyet.>>

³⁷ Oga nnap mpakpak ngga iyam inana ishishì na ta, iyam inana ipir ikùr, iyam inana nnap mbángbàng, iyam inana mpat, iyam inana iga nggòr, kang ká iyam inana iga ntəm ikánkáng.

³⁸ Ka apal aBam aSinayi ka ashe nzam na uYawe nak ûMusa oga nnap mpakpak va ta ká

ilum va_ uza_ là ôlsarila pa_ á yichi oga iyam inana oza_.

8

*Nggòr uHaruna ká ovəvan onunggwan
(Nfa 29.1-37)*

¹ UYawe là ûMusa pa_.

² <<Yar uHaruna, ká ovəvan onunggwan, oga ilukwán, mmì ngga nggòr, ina ìnunggwan iga iyam inana nnap mbángbang, inagam pa_ iparəm, ká mbandár oga nzəngkəng ngga òyà ká ayist ka_.

³ te but nkpaktak mbut onəm ka_ anung Aghal Mbut.>>

⁴ Te uMusa á nəm wa nva uYawe nak á na, kang nggatək onəm but ka_ anung asal_ Aghal Mbut.

⁵ UMusa là mbut onəm pa_ <<Iyam va ta_ uYawe nak pa_ mmá nəm.>>

⁶ Te uMusa ba ká uHaruna ká ovəvan onunggwan kang à nak oza_ wòr izər oza_.

⁷ Uza_ pá ilukwan iga ashe iwángwang ìva ji ûHaruna te uza_ ran á na ká ngbàt ka_ adək, te uza_ pá ìro á na ka_ apəpal, kang à pá ilukwan ìkoksok á na kà. Te uza_ ran á na ká ngbàt ka_ adək.

⁸ Te uza_ pá mpuluk ka_ apal ilukwan ìkoksok á na, kang à nak aUrim ká aTummim* ka_ ashe iyen ilukwan iga apal ilukwan ìkoksok va ta_.

⁹ Uza_ chəp iyam ishi á na ka_ ishi, kang uza_ pá achuchwal aga azənariya nnà iyam ishi iyéryər kà mpipyal, wa nva uYawe nak uMusa.

* **8:8 8.8** aUrim ká aTummim Oga iyam iga iparəm va ta_ unəm uga mpyal awop i nəm inok ká pa_ na ô nyi ndòm Inan.

¹⁰ UMusa yar mmì ngga nggor kang à gor atak ntəm àYawe ká, ká nkpaktak iyam va ka ashishe, te uza gar oza.

¹¹ Uza sháng nro ka apal atak nshì iyam awop nvang pa nfangshat, te uza gor atak nshì iyam awop ká nkpaktak oga iyam inunok, ká adaro, ká atak nchècher, na á gor oza.

¹² Uza zuk mmì ngga nggor nro ka apal ishi aHaruna kang uza gor na, pa ô gar na.

¹³ Te uMusa ba ká ovan aHaruna onungwan mwàk ilukwan ikoksok ôza, ran ngbàt ôza ka adək, kang à mwàk iyam ishi ôza, wa nva uYawe là ûMusa.

¹⁴ Te uMusa ba ká ìna ìnungwan va kakul iyam inana nnap mbángbang, kang uHaruna ká ovan wò onungwan nak awó oza ka apal ishi ìna ìnungwan va ta kakul iyam inana nnap mbángbang.

¹⁵ Te uMusa pà ìna va ta kang à pá ifang ka ashe nchèr kang à bəl gang ka izər oga nggùnggùng ngga atak nshì iyam awop, te uza jen atak nshì iyam awop. Uza tar nchèr ka akum atak nshì iyam awop kang à gar kakul mmwa ishíshi.

¹⁶ UMusa wur nkpaktak mpip va ka izər iyam afu, ká mpip ngga apal anì, ká arùsòk aga aparəm ká mpip oza, kang uza shì oza ka apal atak nshì iyam awop.

¹⁷ Nnyi te, uza yar abo ìna ìnungwan va ta, awá, izhe ká aməməng, te uza shì ká apər kà nsəm apak wa nva uYawe nak ûMusa.

¹⁸ Te uza yichi ìnagam va kakul iyam inana iga nshì, kang uHaruna ká ovan wò onungwan nak awó oza ka apal ishi ìnagam va ta.

19 Te uMusa pà ìnagam vā ta, kang à sháng nchèchər kà nkpaktak ngbak atak nshì iyām awop.

20 Uza nyat ìnagam vā ta pā nyimənnymən, kang uza shì ishíshi, ká ìnyátnyat vā ta, ká mpip.

21 Te uza nāl oga iyām afu ká oga mbwàngbwàng ká ndəng. Uza shì ìnagam vā ta pā dot ká apal atak nshì iyām awop. Á yà chit iyām inana iga nshì pā dot ìnéngnəng ichángchàng ũYawe, wa nva ũYawe nak ũMusa.

22 Á le te uza ba ká ìnagam iga ìparəm, ìnagam iga nggòr, te uHaruna ká ovan wò onunggwan nak awó oza ká apal ishi ìnagam vā ta.

23 Te uMusa pà ìnagam vā ta kang à dok nchèchər bàp ká achwang aHaruna aga awó ari, ká ìfəfang ìnunggwan iga awó ari, ká ìfəfang ìnunggwan iga ashar ari.

24 UMusa ba ká ovan aHaruna kang à bàp nchèr kà oga achwang oza aga awó ari, ká ifang oza ìnunggwan iga awó ari, ká ifang oza ìnunggwan iga ashar ari. Te uMusa sháng nchèchər kà nkpaktak ngbak atak nshì iyām awop.

25 Te uza yar mpip, ká mpip aswal, ká nkpaktak mpip vā ká apal oga iyām afu, ká mpip ngga apal anì, ká arùsòk aga aparəm ká mpip oza, ká ìsong iga awó ari.

26 Ká ashe mbandár nzəngkəng ngga òyà ká ay-ist kat nva kà mpyal àYawe te, uza yar nzəngkəng ngga mmì pā nzəng, ká awoina pā zəng, ká nzəngkəng ndátdàt ngga òyà ká ayist kat pā nzəng, te uza nak oza ká apal mpip ká ìsong iga awó ari.

²⁷ Uza nak nkpaktak oga iyam va ta ka ashe awó aHaruna ká ovəvan onungwan kang à yege oza kà mpyal àYawe wa iyam inana iga nyege.

²⁸ Te uMusa wur oga iyam va ta ka awó oza kang à shì ka apal atak nshì iyam awop ka apal atak iyam inana iga nshì, wa iyam inana iga nggòr inéngnəng ichángchàng, iyam inana iga nshì ûYawe.

²⁹ Uza yar afòr te yege na wa iyam inana iga nyege kà mpyal àYawe. Afòr va aji aMusa ka ashe inagam iga nggòr, wa nva uYawe nak ûMusa.

³⁰ Te uMusa yar ka ashe mmì ngga nggòr nro ká nchèr nro va ka apal atak nshì iyam awop kang à sháng ka apal aHaruna ká ilukwanlukwan, ka apal ovəvan onungwan ká ilukwan oza. Te uza gár uHaruna ká ilukwanlukwan, ká ovəvan onungwan ká ilukwan oza.

³¹ Te uMusa là ûHaruna ká ovəvan onungwan pa, <<Pák izhe ka anung Aghal Mbut kang bù ri ka ta ká nzəngkəng va ka ashe mbandár iyam inana iga nggòr, wa nva n nak, pa, <UHaruna ká ovan wò onungwan i ri.>

³² Te shì abo izhe ká nzəngkəng va le.

³³ Bu yà ká nré anung Aghal Mbut kat ka apal nra pa nfangshat, ya nra ngga nggòr bu i yél kang, kakul nggòr bu i yar nra pa nfangshat.

³⁴ Iyam va mmá nəm n̄da va ta te uYawe à nak pa mmá nəm kakul mmwa ishi bu.

³⁵ Nkpak bu tal ka anung Aghal Mbut izwam ká alum kakul nra pa nfangshat kang bu kpak nnap n̄nəm va uYawe là, le kang wa kú kat, kakul iyam va ta mmá nak á mi.>>

³⁶ Te uHaruna ká ovan wò onungwan nèm nkpaktak iyam va uYawe nak ka atak aMusa.

9

Onəm oga mpyal awop bàn inok oza

¹ Ka apal nra ngga nñanne te uMusa wór uHaruna ká ovəvan onungwan, ká onəmgbak oga aIsarila.

² Uza là ûHaruna pa, <<Kpán iyen ina ìnungwan kakul iyam inana nnap mbángbang bu ká ìnagam kakul iyam inana iga nshì, nkpaktak oza á yà ká ndaktak kat, te yichi oza kà mpyal àYawe.

³ Te là ôIsarila pa, <Kpán ibèl ìnungwan kakul iyam inana nnap mbángbang, ina ká ìnagam iga izun pa izəng, iva yà ká ndaktak kat, kakul iyam inana iga nshì.

⁴ Kà dĩ te, yar ina ìnungwan ká ìnagam kakul nləfər iyam inana iga ntəm ikánkáng kà mpyal àYawe, ká iyam inana ipir ikùr gwang ká mmì. Kakul nda va ta uYawe i ga nnyám ishi wò á wó.>>

⁵ Oza ba ká iyam va uMusa nak ôza kà mpyal Aghal Mbut, kang nkpaktak onəm ba tong kà mpyal àYawe.

⁶ Te uMusa là pa, <<Iyam va ta uYawe nak wó pa ó nəm, na á nyám izhàn àYawe á wó.>>

⁷ Te uMusa là ûHaruna pa, <<Ba atak nshì iyam awop, te yichi iyam inana nnap mbángbang, ká iyam inana iga nshì bu. Te nəm mmwa ishi nji bu ká ishi onəm, te ba ká iyam inana onəm kang bù nəm mmwa ishi oza wa nva uYawe nak.>>

⁸ Te uHaruna ba dát ká atak nshì iyam awop kang à pà ina ìnunggwan, kakul iyam inana nnap mbángbàngbàngbàng.

⁹ Kang ovan aHaruna onunggwan ba ká nchèr á na, te uza pá ifang wò ká ashe nchèr kang à bél ká izèr oga nggùnggùng ngga atak nshì iyam awop. Uza tar abo nchèr va ta ká akum atak nshì iyam awop.

¹⁰ Nnyi te, mpip, oga arùsòk, ká mpip ngga apal anì ká ashe iyam inana nnap mbángbàng, uza shì ká apal atak nshì iyam awop, wa nva uYawe nak ûMusa.

¹¹ Uza shì izhe ká awá kà nsəm apak.

¹² Te uza pá iyam inana iga nshì. Ovan aHaruna onunggwan ba ká nchèr á na, kang uza sháng gang oga ngbak izèr atak nshì iyam awop.

¹³ Oza ba ká iyam inana iga nshì á na, inyatnyat, nzəng ká ishi, kang uza shì oza ká apal atak nshì iyam awop.

¹⁴ Uza nàl iyam afu ká oga mbwangbwang kang à shì oza ká apal atak nshì iyam awop nzəng ká iyam inana iga nshì.

¹⁵ UHaruna yichi iyam inana iji onəm. Uza kpán ibèl ìnunggwan va kakul iyam inana nnap mbángbàng onəm pà, kang à yichi na wa iyam inana nnap mbángbàng wa nva uza ká nəm ká iga nggəshi.

¹⁶ Uza ba ká iyam inana iga nshì kang à yichi wa nva nnap mpakpak là.

¹⁷ A le te uza yichi iyam inana ipir ikùr, uza kpak ká ashishe ká awó pà sùr, te shì ká apal atak nshì iyam awop kà ngbak iyam inana iga nshì ká ipín.

¹⁸ Te uza pà ìna ìnunggwan ká ìnagam wa nləfər iyam inana iga ntəm ikánkáng iji onəm. Ovan aHaruna ba ká nchər á na, kang uza sháng kà nkpaktak ngbak atak nshì iyam awop.

¹⁹ Nnyi te, mpip ìna ká ìnagam, mpip aswal, mpip va gún oga iyam afu, oga arùsòk, ká mpip ngga apal anì,

²⁰ oza nak oga mpip va ta ka apal afòr, te uHaruna shì oga mpip va ta ka apal atak nshì iyam awop.

²¹ Kang uHaruna yege afòr ká ìsong iga awó ari kà mpyal àYawe, wa iyam inana iga ñyege, wa nva uMusa nak.

²² UHaruna yichi awó wò ka apal onəm kang uza nak nnap nnənan ôza. Nvangva uza yichi iyam inana nnap mbángbang, ká iga nshì, ká iga ntəm ikánkáng, te uza fər vàng.

²³ UMusa ká uHaruna táng ashe Aghal Mbut. Kà nvàng va oza fa te, oza nak nnap nnənan onəm kang ìzhàn àYawe fa nkpaktak onəm.

²⁴ Apər fa ka atak aYawe kang à ri iyam inana iga nshì, ká mpip va ka apal atak nshì iyam awop. Awalang va nkpaktak onəm ya te, oza gham achu, ru zəp ká afu kà mbin.

10

Ikú aNadap ká uAbihu

¹ Ñyangmatà uNadap ká uAbihu Ovan aHaruna onunggwan, udanggo yar asu apər wò nak apər ka ashishe kang oza nak njəng nnəngnəng ka apəpal, te oza yichi apər agafak kà mpyal àYawe, ava uza nak oza kà kat á.

² Ta byet te, uYawe re nrè ká apər pwák oza kang oza kú kà mpyal àYawe.

³ Te uMusa là ûHaruna pa, <<Iyam va ta uYawe là nva uza là pa,

<< <Nkpaktak onəm va nəm inok á mi te
nkpak i yar mi uyéryər,
kang mi nyám izhàn mi ônəm mi.> >> Nnyi te,
uHaruna mar pa kwák.

⁴ UMusa wór uMishayel ká uEləzafan, ovan aUzayel onungwan ukyan àHaruna, uza là ôza pa, <<Ó ba ka ta, ó wur akúm onal wó á le kà mpyal Atak Ayéryər ó ga ká kà nsəm apak.>>

⁵ Te oza ba dát kang à wur oza ká ilukwán awop nna à yà ka izər oza fa ká kà nsəm apak wa nva uMusa là.

⁶ Te uMusa là ûHaruna ká ovəvan uEliyaza ká ultama pa, <<Kang ó re akpap ishi wó a nyat kat, kang ó kan ilukwán wó kat, kat te ó kú kang mmən ikum àYawe i fər ka apal nkpaktak nzhi àlsarila. Nnyi te, onal wó ká nkpaktak nzhi àlsarila i yiyəng kakul onəm va uYawe zhì ká apər.

⁷ Kang ó fa agbai Aghal Mbut kat, le kang ó kú, kakul mmì ngga nggòr àYawe nna yà ka apal wó.>> Te oza nəm wa nva uMusa là.

⁸ Te uYawe là ûHaruna pa,

⁹ <<Kang ó wá ndəng ibəngbəng kat, kat te iyam iwawa ikamkam, mmaɓu kat te ovan bu awalang va ó táng ashe Aghal Mbut, le kang ó kú. Nva ta nnap mpakpak va təm chit mbyet mbyet kakul nkpaktak oga nlwàk wó.

¹⁰ Nkpak bu van ìshimshe iyéryər ká iva yər kat, ìshimshe inənan ká iga adak,

¹¹ te ó dyáng ôlsarila nkpaktak oga nnap mpakpak va uYawe na ôza ká atak aMusa.>>

¹² UMusa là nnap ká uHaruna ká abo ovəvan onunggwan, uEliyaza ká ultama, <<Yar iyam inana ipir ikur va le ká ashe oga iyam inana iga nshì uYawe, te ri ká ayist kat ká ngbak atak nshì iyam awop, kakul iyéryər va ji.

¹³ Ó ri iyam inana ipir ikur ká Atak Ayéryər kakul iyam iji bu ká ovan bu onunggwan ká ashe iyam inana iga nshì uYawe, kakul wa nnà ta mmá nak á mi.

¹⁴ Nnyi te, mma bu ká ovan bu onunggwan ká ochar mmá məman á wó pa ó ri afòr iyam inana iga nyeye ká isong va mmá yichi ká atak anənan. Kakul bu ká ovan bu va ká bu, kakul mmá na oza á bu chit iji bu ká ovan bu ká ashe nləfər iyam inana iga ntəm ikánkáng oIsarila.

¹⁵ Isong ibutbut ká afòr iyam inana iga nyeye va mmá yege, nkpak mí ba ká, ká ngbak mpip ngga iyam inana iga nshì, te mí yege wa iyam inana iga nyeye ká mpyal àYawe. Te iyam va ta i yà iji bu ká ovan bu onunggwan mbyet mbyet, wa nva uYawe nak.>>

¹⁶ Nvangva uMusa bəp nnap ibəl inunggwan iga iyam inana nnap mbángbang, kang uza ya mmá shì te, igwak lak na ká uEliyaza ká ultama, ovan aHaruna va re, te uza bəp pa,

¹⁷ <<Sang kang ó ri iyam inana iga nnap mbángbang ká ashe Atak Ayéryər kat yà? Kakul iyéryər va ji, kang mmá na á bu kakul nyar mpat

onəm, na ú mwa ishi ká kákul oza kà mpyal àYawe.

¹⁸ Dər, nchèchər mmá ba ká ka ashe Atak Ayéryər kaṭ, te á mál pa ká ó ri ka ashe Atak Ayéryər wa nva n nak á.>>

¹⁹ Te uHaruna là ûMusa pa, <<Dər, n̄da va ta oza yichi iyam inana nnap mbángbang oza ká iyam inana iga nshì oza kà mpyal àYawe. Apir nnap nnəm va ta ya mi chit. Ká yà pa n ri iyam inana iga nnap mbángbang ri n̄da va ta, te ká yà dakdak kà mpyal àYawe dò?>>

²⁰ UMusa fe nnap va ta te, uza məman ká.

11

*Izhé va ká adak ká iga n̄yà ká adak kaṭ
(Ndan NM 14.3-21)*

¹ UYawe là ûMusa ká uHaruna pa,

² <<Là ôlsarila pa, ka ashe nkpaktak izhé iga apambin te, iyam iga irirì va ta ó ri.

³ İzhe va ká ifir kap pa iparəm kang i bələk nri bələk te ó riri.

⁴ Ká nnà te, ó yà ká nri ka ashe iva ta kaṭ, iva i bələk nri bələk kang ifir kap kaṭ. ALakəmi, káp ká nva i bələk nri bələk te ifir kap kaṭ. Ká adak ka atak wó.

⁵ İchəm, káp ká nva i bələk nri bələk, te ifir kap kaṭ. Ká adak ka atak wó.

⁶ İzum, káp ká nva pa i bələk nri bələk, ifir kap kaṭ. Ká adak ka atak wó.

⁷ İri, káp ká nva pa ifir kəkàp, i bələk nri kaṭ. Ká adak ka atak wó.

⁸ Ó yà ká nrí ìzhe oza, kaṭ te ó dok akúm oza kaṭ, oza ká adak ka atak wó.

⁹ <<Oga iyam va ta ó riri ka ashe nkpaktak iyam iga ashe ndəng. Nza iyam nggo va ka ashe ndəng ká iyam iga nyel ndəng ká akwarak, mo te ka ashe iwá kaṭ te oga awáng, ó ri oza ri.

¹⁰ Nnyi te, nza iyam nggo va ka ashe iwá kaṭ te oga awáng va yà ká iyam iga nyel ndəng ká akwarak kaṭ ka ashe nkpaktak oga iyam va i yiyel ka ashe ndəng, ká nkpaktak iyam irirì iga ashe ndəng, oza iyam iga ajan ka atak wó.

¹¹ Oza iyam iyéryər ka atak wó, ó yà ká nrí ìzhe oza kaṭ. Akúm oza ó nak i sat iyam iga ajan ka atak wó.

¹² Nza iyam nggo va ka ashe ndəng yà ká iyam iga nyel ndəng ká akwarak kaṭ te, iyam iga ajan ka atak wó.

¹³ <<Ka ashe oga inyil va ta ó nak i yà iyam iga ajan, ó ri kaṭ. Oza iyam iga nnəm ajan, nkpak pa ó ri oza kaṭ, kakul oza ká adak òmà nkumànggəp, nggùlúk, nggùlúk nləbər,

¹⁴ ikəkəp, ká apir oga ikəkəl pa dɔngdɔng.

¹⁵ Nza apir igurok nggo,

¹⁶ ká ajimina, ìzəng, ìnyil ndəng, ikəkəl,

¹⁷ ìzəng ibwakan, itula iga anyin, ká iwórkú,

¹⁸ ìzəng iləfər, ìzəng iga ashe nzam, nggùlúk,

¹⁹ ká ibo, oga mbyapbyap, igulyat ká mbiləm.

²⁰ <<Nza iyam nram nggo iga alyàng va i chen ká ashar pa nedíng te, i yà iyam iga ajan ka atak wó.

²¹ Ká nnà te, o ri nkpaktak iyam nram iga alyàng iva ká ashar pa nedíng, kang ká agwap kakul mmyatmyat.

22 Ó rirí kà ashe i vā tā. Oga mban ìkum n zā apir nggo, oga arəgbak n zā apir nggo, oga igigyak n zā apir nggo ká oga akangshat n zā apir nggo.

23 Ká nnà te iyām n rām iga alyàng vā ká ashar pā nedīng te iyām iga ajan kà atak wó.

24 <<Iga iyām vā tā i nak wó ó yà ká adak. N zā unəm nggo vā dok akúm o zā te i yà ká adak i ga i chu arurong.

25 Kang n zā unəm nggo vā wur oga akúm o zā te, u zā i nàl ìlukwan wò kang u zā i təm ugga adak i ga i chu arurong.

26 N zā ìzhe nggo vā kak ifir pā iparəm kāt, kāt te i bələk nrì kāt, te o zā ká adak kà atak wó. Nkpaktak unəm vā dok o zā te u zā i yà ká adak.

27 N zā iyām nggo kà ashe ìzhe iga ashar pā nedīng vā i chen ká ndong ashar wò te, o zā ká adak kà atak wó. Nkpaktak unəm vā dok akúm o zā te u zā i yà ká adak i ga i chu arurong.

28 Kang nkpaktak unəm vā wur akúm o zā te, u zā i nàl ìlukwan wò kang u zā i təm uga adak i ga i chu arurong. O zā ká adak kà atak wó.

29 <<Oga iyām iga nkpàng ká afu kà ashe iyām iga nkpàng kà mbin vā tā te ká adak kà atak wó. ìshakmən, ìpi, apir oga ìboli inənanng pā dōngdōng,

30 ìbaligànggang, ìkun, ìboli, ìshang, ká ìtasəm.

31 Iva tā kà ashe nkpaktak ìzhé iga nkpàng kà mbin iyām iga ajan kà atak wó. Unəm vā kpaktak dok o zā ya o zā kú chit te, u zā i yà ká adak i ga i chu arurong.

32 Nkpaktak iyām vā o zā ru kà, kà awalang vā o zā kú chit te, i yà ká adak. Mo te iyām inok iga akun kāt te ìlukwan, kāt te awá, kāt te ìlukwan

ìlòklòk, kaṭ te nza iyam inok nggo. Kang mí nəm inok ká te, pá ka ashe ndəng, te i yà ká adak i ga i chu arurong, nnà chit te i yà inənan ɗak.

³³ Kang a yà pa iro ka ashe oza ru ka ashe ngbət amè, nza iyam nggo va ka ashishe te i yà ká adak, te nkpak ó chwan.

³⁴ Iyam nri va ndəng ngga ashe iyam inok va ta sháng kà te, i yà ká adak. Kang nza iyam iwawa nggo va ka ashe iyam inok va ta, i yà ká adak.

³⁵ Iyam va kpaktak akúm oza ru kà te i yà ká adak. Achər apər aga nwàng iyam, kaṭ te achər, te mí shin, oza ká adak, iyam iga adak ka atak wó.

³⁶ Ká nnà kpa te, iwú ndəng kaṭ te ache agga nkpán ndəng i yà anənan, kang unəm va dok akúm va ka ashishe te uza i yà ká adak.

³⁷ A yà pa ngbak akúm oza nro ru ka apal apir iyam nsuk, te i yà inənan,

³⁸ nnyi te a yà pa mmá nak ndəng chit ka apal apir iyam nsuk va ta, kang ngbak akúm oza nro ru ka apəpal te, ká adak ka atak wó.

³⁹ <<A yà pa izəngtəng ka ashe izhe va mmá məman á bu pa ú ri kang à kú, kang nkpaktak unəm va dok akúkum te uza i yà ká adak i ga i chu arurong.

⁴⁰ Kang nza unəm nggo va ri akúkum te i nàl ilukwán wò kang uza i yà ká adak i ga i chu arurong. Kang nza unəm nggo va wur akúkum te i nàl ilukwán wò kang uza i yà ká adak i ga i chu arurong.

⁴¹ <<Nza iyam iga irirì nggo va i kpàng ká afu kà mbin te iyam iga nnəm ajan, mí ri oza kaṭ.

⁴² Nza iyam nggo iga nkpàng ká afu, ká iga nchen ká ashar pa nedíng kat te ashar pa kyák ka ashe nkpaktak iyam iga irirì iga nkpàng ká afu kà mbin ó ri kat, kakul oza ká ajan.

⁴³ Kang ó nak ishi wó a yà iga ajan ká iyam va i kpàng ká afu kat. Kang ó nak ishi wó a yà ká adak, na ó yà oga adak ka atak oza kat.

⁴⁴ Kakul mmami na uYawe, Inan wó. Ó gòr ishi wó na ó yà oyéryer kakul mmami uyéryer. Kang ó vyap ishi wó ka atak oga iyam iga nkpàng ká afu kà mbin kat.

⁴⁵ Kakul mmami na uYawe, uva fa ká wó kà mbin aMasar na n yà Inan wó. Ó yà oyéryer kakul mmami uyéryer.>>

⁴⁶ Nnap mpakpak nà ta kakul iyam nkang, inyil, ká nkpaktak iyam iga irirì va ka ashe ndèng ká nkpaktak iyam iga irirì iga nkpàng ká afu kà mbin.

⁴⁷ Kakul na mmá van ishimshe iyam iga adak ká iva iga adak kat, ishimshe izhé va màl pa mmá ri ká iva màl pa mmá ri kat.

12

Nnàl uchar kà nvang amar

¹ UYawe là ûMusa pa,

² <<Là ôlsarila pa, a yà pa uchar tèm ká anyám kang à mar uyen ununggwan te, uza i yà ká adak nra pa nfangshat. Wa nva uza ka yà kà nra va uza ka yà ká akpar, uza i yà ká adak.

³ Mí pà achè úyen va ta kà nra ngga nnanne.

⁴ Uza i ga mpyal ká nnàl nchèr wò i ga i chu nra isèm pa ishatding aman pa shatding. Uza i

yà ká ndok iyám iro iyéryər kaṭ, kaṭ te i tar Atak Ayéryər kaṭ, ya uza i gbaḷ ká nnàl nchèr wò kang.

⁵ Kang a yà pa uza mar uyen uchar te, uza i yà ká adak asati pa parəm wa adak akpar wò. Uza i ga mpyal ká nnàl nchèr ka apal nra isəm pa ikpaḍing aman pa kpaḍing.

⁶ << Ìlum va nra ngga nnàl nchèr i kùr kaḱul áyen ununggwan kaṭ te uyen uchar te, uza i ba ká ìnagam iga izun pa izəng ûnəm uga mpyal awop kaḱul iyám inana iga nshì ka anung Aghal Mbut, kang ká ìlèkpar kaṭ te iruzum kaḱul iyám inana nnap mbángbang.

⁷ Unəm uga mpyal awop á yichi oza kà mpyal àYawe kang i mwa ishishi ká. Te uza i yà unálnàl ka atak nzuk nchèr wò. Nnap mpakpak va ta kaḱul áchar va mar ununggwan kaṭ te uchar.

⁸ Kang a yà pa uza yà ká ìnagam kaṭ, te uza á wur ilèkpár pa iparəm kaṭ te iruzum pa iparəm. Pa izəng kaḱul iyám inana iga nshì kang izəngtəng kaḱul iyám inana nnap mbángbang. Te unəm uga mpyal awop i mwa ishishi ká kang uza i yà unənan.> >>

13

Nnap mpakpak ka apal oga arwa nlak

¹ UYawe là ûMusa ká uHaruna pa,

² <<A yà pa awá izər ánəmləbər mu, kaṭ te izər iwárwár, kaṭ te mbàp nləfər va á wong á yà arwa nlak ka apal awá izəzər, te mí ba ká na ka atak aHaruna unəm uga mpyal awop, kaṭ te ka atak azəngtəng ka ashe ovəvan oga mpyal awop.

³ Unəm uga mpyal awop á nak iwú ka arwa va ka awá izəzər, kang a yà pa akpap aga iwú arwa va ta a gaḅan aləfər kang iwú arwa á gbàng te, arwa nlak. Unəm uga mpyal awop i dər te i shet pa uza ká adak.

⁴ Nnyi te, a yà pa mbàp nləfər va ka awá izəzər gbàng ji awá izər ji kat, kang akpap va ka ashishe gaḅan yà aləfər kat, te unəm uga mpyal awop i kùk na nra pa nfangshat.

⁵ Ka apal nra ngga nfangshat te unəm uga mpyal awop a dər na pa dóng, kang a yà pa arwa va ta gaḅan kà iwúwu kat, á lok gang izəzər kat, te unəm uga mpyal awop i kùk na kà dí nra pa nfangshat.

⁶ Unəm uga mpyal awop a dər na pa dóng kà nra ngga nfangshat kà dí. Kang a yà pa arwa va ta pwar chit a lok gang awá izər kat, te unəm uga mpyal awop i shet pa uza yà ká adak kat, izər iwárwár nà pa mwang. Te uza i nàl ilukwan wò, te uza i yà ká adak kat.

⁷ Kang a yà pa izər iwárwár lok ga mpyal kà nvaṅ va uza nyám ishi wò ûnəm uga mpyal awop chit kakul nnàl izər wò, te uza i nyám ishi wò ûnəm uga mpyal awop kà dí.

⁸ Unəm uga mpyal awop i dər na, kang a yà pa izər iwárwár va ta lok chit gang izəzər, te unəm uga mpyal awop i shet pa uza ká adak, arwa nlak.>>

⁹ <<A yà pa arwa nlak kpán unəmləbər, te mí ba ká na ûnəm uga mpyal awop.

¹⁰ Unəm uga mpyal awop i dər na, kang a yà pa izər mu iləfər kang à gaḅan akpap chit aləfər, kang izər imúmu va ta tung anunur te,

11 arwa nlak mbángbang ka awá izəzər. Te unəm uga mpyal awop i shet pa uza ká adak, uza i kuk na kat, kakul uza ká adak.

12 Kang a yà pa arwa va ta á fa ka izər, kang à dàngchi nkpaktak awá izər ánəm uga arwa, bàn ka ishishi vàng ashishar, va iwú ànəm uga mpyal awop yiya,

13 unəm uga mpyal awop i dər, kang a yà pa arwa awá izər va ta dàngchi izəzər pa kpaktak, te uza i shet pa unəm uga arwa va ta yà ká adak kat. Kakul á gaban chit yà aləfər, uza yà ká adak kat.

14 Kang nra va ri anunur te, uza i yà ká adak.

15 A yà pa unəm uga mpyal awop dər anunur va ta te uza i shet pa uza ká adak. Anunur va ta adak, arwa nlak.

16 Nnyi te, a yà pa anunur va ta gaban nyáng aləfər kà dí, te uza i ga atak ánəm uga mpyal awop.

17 Unəm uga mpyal awop i dər pa dóng kang a yà pa arwa va ta gaban aləfər, te unəm uga mpyal awop i shet pa unəm uga arwa va ta yà ká adak kat. Uza yà ká adak kat.>>

18 <<A yà pa nsomo fa ûnəm ka izər kang à tàn,

19 kang a yà pa atak nsomo va ta mu bap nləfər kat te nrəzang ká nləfər, te uza i nyám ishi wò ûnəm uga mpyal awop.

20 Unəm uga mpyal awop i nak iwú kà, kang a yà pa á gbàng ka avəng awá izər, kang akpap va ka ashishe gaban chit aləfər, te unəm uga mpyal awop i shet pa uza ká adak. Arwa nlak mbángbang à fa kà iwú nsomo.

21 Kang a yà pa unəm uga mpyal awop dər pa dóng, kang akpap aləfər yà ka ashishe kat, kang à

gbàng ka avəng awá izər kaṭ, á pwar chit, te unəm uga mpyal awop i kuk na nra pa nfangshat.

²² A yà pa lok gà mpyal ka apal awá izər, te unəm uga mpyal awop i shet pa uza ká adak, arwa.

²³ Nnyi te, a yà pa mbàp va ta lok kaṭ á sat ka ta, te ya adál nsomo. Te unəm uga mpyal awop i shet pa uza yà ká adak kaṭ.>>

²⁴ <<Kaṭ te a yà pa apər à shì unəm ka awá izər, kang atətak bap nrəzang ká nləfər kaṭ te bap nləfər te,

²⁵ unəm uga mpyal awop a dər pa dóng. Kang a yà pa akpap aga atak mbàp va ta gaḃan nləfər kang à gbàng ka avəng awá izər te, ya arwa nlak à fa ka atak nlok apər va ta. Unəm uga mpyal awop i shet pa uza ká adak, arwa nlak.

²⁶ Nnyi te, a yà pa unəm uga mpyal awop a dər pa dóng, kang akpap aləfər yà ka ashishe kaṭ, kang à gbàng ka avəng awá izər kaṭ, á pwar chit, te unəm uga mpyal awop i kuk na nra pa nfangshat.

²⁷ Unəm uga mpyal awop i dər na kà nra ngga nfangshat, a yà pa kà ngga mpyal ká nlok izər. Te unəm uga mpyal awop i shet pa uza ká adak, arwa nlak.

²⁸ Kang a yà pa mbàp va ta lok kaṭ á sat ka ta kang à pwar chit, te i yà iyaṃ mmu ka atak nshì apər. Unəm uga mpyal awop i shet pa uza yà ká adak kaṭ, kaḱul adál anunur nshì apər.>>

²⁹ <<A yà pa ununggwan kaṭ te uchar ká arwa ka ishi kaṭ te igel,

³⁰ Unəm uga mpyal awop i dər arwa va ta pa dóng, kang a yà pa a gbàng ka avəng awá izər,

kang akpap aga iwúwu wa ndəng ilur pa shiriri. Te unəm uga mpyal awop i shet pa uza ká adak. Nandangbyat, arwa nlak aga ishi kat te aga igel.

³¹ A yà pa unəm uga mpyal awop a dər arwa va ta pa dɔ́ng, kang à nyám gbàng ka avəng awá izər kat, kang akpap aləbər yà ka ashishe kat, te unəm uga mpyal awop i kuk unəm uga ndangbyat va ta nra pa nfangshat.

³² Kà nra ngga nfangshat te, unəm uga mpyal awop i dər arwa va ta. Kang a yà pa ndangbyat va ta lok kat, kang akpap aga ashishe wa ndəng ilur kat, kang ndangbyat va ta gbàng ka avəng awá izər kat,

³³ te unəm va ta i kpat ishi wò, uza i kpat atak ndangbyat va ta ji wò kat. Unəm uga mpyal awop i kuk na nra pa nfanshat kà dí.

³⁴ Kà nra ngga nfangshat te unəm uga mpyal awop i dər ndangbyat va ta, kang a yà pa lok gbàng ka avəng awá izər kat, te unəm uga mpyal awop i shet pa uza ká adak. Uza i nàl oga ilukwán wò, te uza i yà ká adak kat.

³⁵ Kang a yà pa ndangbyat va ta ga mpyal ká nlok ka awá izər kà nvəng nnàl na,

³⁶ te unəm uga mpyal awop i dər pa dɔ́ng. Kang a yà pa ndangbyat lok awá izər chit, te unəm uga mpyal awop i đak kà mmo akpap aga ndəng ilúr kat, uza ká adak.

³⁷ Kang a yà pa kà ndər nji ànəm uga mpyal awop te á gəbən kat kang akpap aləbər fa chit ka ashishe, te ndangbyat tən chit, uza yà ká adak kat, te unəm uga mpyal awop i shet pa uza yà ká adak kat.>>

³⁸ <<A yà pa ununggwən kat te uchar yà ká oga

mbàp nləfər ka awá izər,

³⁹ te unəm uga mpyal awop i nak iwú kà, kang a yà pa mbàp ngga awá izər va ta gbaḷ pa bit wa nchwang te, izər iwárwár íbángbàng kaṭ à fa ka awá izər. Uza yà ká adak kaṭ.>>

⁴⁰ <<A yà pa unəm lang akpap aga ishi wò, te uza ká isu ígbatəng, uza yà ká adak kaṭ.

⁴¹ A yà pa uza lang akpap kà isu wò, uza ugbatəng kà isu, te uza yà ká adak kaṭ.

⁴² Kang a yà pa ishi ígbatəng kaṭ te isu ígbatəng ká mbàp nrəzang ká nləfər, te ya nlak mbángbàng à fa ka ishishi ígbatəng, kaṭ te isusu ígbatəng.

⁴³ Unəm uga mpyal awop i dər pa dóng, kang a yà pa arwa mmu nrəzang ká nləfər ka apal ishishi ígbatəng, kaṭ te isusu ígbatəng, wa nfa nlak mbángbàng ngga izər,

⁴⁴ te unəm va ká nlak mbángbàng, uza ká adak. Unəm uga mpyal awop i shet pa uza ká adak, arurwa ka ishishi.>>

⁴⁵ <<Unəm va ká arwa nlak te uza i pá aryakryak kang i re akpap ishi wò i la, te uza i gún anung wò ká awó kang i nəm achu pa, <Adak, adak.>

⁴⁶ Uza i yà uga adak nkpaktak awalang va arwa va ta nna à yà kà na, uza ká adak. Uza i tēm ká nkukwa, atak ntətəm i yà kà nsəm apak.>>

⁴⁷ <<A yà pa nlak mbángbàng ka izər ilukwan iga awúlu, kaṭ te iga alinin,

⁴⁸ kaṭ te iyam ilóklòk iga awúlu, kaṭ te alinin, kaṭ te awá, kaṭ te iyam iga nnəm ká awá.

⁴⁹ Kang a yà pa arwa nyám ndəng ipəpa, kaṭ te nrəzang ka izər ilukwan, kaṭ te awá, kaṭ te iyam

ilóklòk, kaṭ te nza apir iyaṃ nggo va mma nēm ká awá, te arwa nlaḱ, nkpaḱ mí nyám ûnēm uga mpyal awop.

⁵⁰ Unēm uga mpyal awop i dər arwa va ta pa dóng, kang i kùk iyaṃ iga arwa va ta nra pa nfangshat.

⁵¹ Kà nra ngga nfangshat te, unēm uga mpyal awop i dər arwa va ta kà dí. A yà pa arwa va ta lok ka izər ilukwan, kaṭ te iyaṃ ilóklòk, kaṭ te awá, kaṭ te nza apir iyaṃ nggo va mma nēm ká awá te, ya arwa nlaḱ mbángbàng, ká adak.

⁵² Uza i shì ilukwan va ta, kaṭ te iyaṃ ilóklòk, kaṭ te itáttát iga awúlu, kaṭ te alinin, kaṭ te nza iyaṃ nggo iga awá va arwa kà, kakul nlaḱ mbángbàng, nkpaḱ mí shì ká apər.

⁵³ <<Kang a yà pa unēm uga mpyal awop dər arwa va ta pa dóng kang à lok ka izər ilukwan, kaṭ te iyaṃ ilóklòk, kaṭ te itáttát, kaṭ te nza iyaṃ iga awá nggo kaṭ,

⁵⁴ te unēm uga mpyal awop i nak mí nàl iyaṃ va arwa ka izəzər kang uza i kuk kà dí nra pa nfangshat.

⁵⁵ Kà nvaṅ va mma nàl chit te, unēm uga mpyal awop i dər arwa va ta kà dí. A yà pa arwa aga izər iyaṃ va ta gaḃan kaṭ, kang arwa va ta lok kaṭ, te ká adak. Nkpaḱ bu shì ká apər, a yà pa ka ashe, kaṭ te ka asaḷ nsəm ilukwan.

⁵⁶ <<Nnyi te, a yà pa unēm uga mpyal awop dər pa dóng, kang atak arwa va ta pwar chit, kà nvaṅ va mma nàl chit, te uza i cha atak va ta i le ka izər ilukwan, kaṭ te awá, kaṭ te iyaṃ ilóklòk, kaṭ te itáttát.

⁵⁷ Kang a yà pà á le fa kà izər ìlukwan, kaṭ te iyaṃ ilóklòk, kaṭ te itáttát, kaṭ te nza iyaṃ iga awá nggo, kà nlok, te nkpak bu shì nza iyaṃ nggo va ká arwa.

⁵⁸ Kang a yà pà ìlukwan, kaṭ te iyaṃ ilóklòk, kaṭ te itáttát, kaṭ te nza iyaṃ iga awá nggo, arwa lar kà izər oza ya u nàl chit, te nàl kà dí, te i yà ká adak kaṭ.>>

⁵⁹ Nnap mpakpak nà ta ngga arwa nlak ngga izər ìlukwan awúlu, kaṭ te alinin, kaṭ te iyaṃ ilóklòk, kaṭ te itáttát, kaṭ te nza iyaṃ iga awá nggo, pà mmá shet pà iga adak kaṭ, kaṭ te iga adak.

14

Nnàl kà atak arwa nlak

¹ UYawe là ûMusa pa,

² <<Nnap mpakpak nà ta kà apal ánəm uga arwa nlak kà ìlum iga nnàl na. Mí ba ká na ûnəm uga mpyal awop,

³ kang unəm uga mpyal awop i fa nsəm apak, kang i dər na pà dóng. A yà pà arwa nlak va ta tən chit kà izər ánəm uga arwa nlak,

⁴ te unəm uga mpyal awop i nak unəm uro i kam inyil pà iparəm iga irirì va yà ká ndaktak kaṭ, akun asida, atani bán pà gar, ká azang aro mí wór pà ahisop kakul anəm va mí nàl.

⁵ Te unəm uga mpyal awop i nak pà mmá pà izəngtəng inyil va ta kà apal ndəng nnənan kà ashe ngbət amè.

⁶ Uza i yar inyil iga irirì va ká akun asida, ká atani bán pà gar, ká azang ahisop. Uza i mwàk

oza ká ìnyil iga irirì kà ashe nchèr ìnyil vā mmá pà kà apal ndəng nnənan.

⁷ Uza i sháng nchèr ìnyil vā ta nvang pā nfangshat kà apal ánəm vā mmá kà nnàl nā kà atak arwa nlak, te uza i shet pā uza yà ká adak kat, te uza i sək ìnyil iga irirì vā ta i ga kà agbagba.

⁸ Unəm vā mmá kà nnàl nā te, uza i nàl ìlukwan wò, i kpat nkpatk akpap wò, kang i wòr izər kà ashe ndəng te i yà ká adak kat. Kà nvəvang te uza i tar ashe apak kang uza i təm kà nsəm aghal wò nra pā nfangshat.

⁹ Kà nra ngga nfangshat te uza i kpat nkpatk akpap wò, ishi, nggyèr, akpap iwú, ká nkpatk akpap. Te uza i nàl ìlukwan wò kang i wòr izər wò kà ashe ndəng te i yà ká adak kat.

¹⁰ <<Kà nra ngga nnanne te uza i wur inagam pā iparəm iva yà ká ndaktak kat ká itam ìchar iga izun pā izəng iva yà ká ndaktak kat, ká iyam inana ipir ikùr mmaḱ nyalyal ikpáng pā ishātḱing kà ashe agbapchi, mmá gwang ká mmi, ká abo afal mmi mpyet pā nzəng.

¹¹ Unəm uga mpyal awop vā i shet pā uza unənan i nak unəm vā mí ga nnənəl nzəng ká oga iyam vā ta kà mpyal àYawe kà anung Aghal Mbut.

¹² Unəm uga mpyal awop i kpán inagam pā izəng i yichi wa iyam inana mpat nzəng ká mmi mpyet, kang uza i yege oza wa iyam inana iga nyege kà mpyal àYawe.

¹³ Uza i pā inagam vā ta kà atak mpà iyam inana iga nnap mbángbàng, ká iga iyam inana iga nshì kà ashe Atak Ayéryər. Kàkul iyam inana iga nnap

mbángbàng wa iyám inana iga mpat, iji ánəm uga mpyal awop, iyéryər va ji.

¹⁴ Unəm uga mpyal awop i pá nchər iyám inana mpat i bàp ká achwang aga awó ari, ká ìfang ìnunggwan iga awó ari, ká ìfang ìnunggwan iga ashar ari ánəm va mí ga nnənal.

¹⁵ Unəm uga mpyal awop i yar abo mmì mpyet va ká ashe afàl i zuk ká ashe awó wò apam.

¹⁶ Unəm uga mpyal awop i pá ìfang wò iga awó ari ká ashe mmì va ká ashe awó wò apam, kang i sháng mmì va ta ká ìfang wò nvàng pa nfangshat ká mpyal àYawe.

¹⁷ Ká ashe abo mmì va le ká awúwo te, unəm uga mpyal awop i bàp ká achwang aga awó ari ánəm va mmá ká ngga nnàl na, ká apal ìfəfang ìnunggwan iga awó ari, ká apal ìfəfang ìnunggwan iga ashar ari, ká apal nchər iyám inana iga mpat.

¹⁸ Abo mmì va le ká ashe awó ánəm uga mpyal awop te, uza i nak ká ishi ánəm va mí ga nnənal. Te unəm uga mpyal awop i mwa ishi ká kákúkul ká mpyal àYawe.

¹⁹ Unəm uga mpyal awop i yichi iyám inana iga nnap mbángbàng kang i mwa ishi ká kákul ánəm va mmá ká nnàl adədak. Ká nvəvàng te uza i pá iyám inana iga nshì.

²⁰ Te unəm uga mpyal awop i yichi iyám inana iga nshì ká iyám inana ìpir ìkùr ká apal atak nshì iyám ngwop. Wa nnà ta unəm uga mpyal awop i mwa ishi ká kákúkul, te uza i yà ká adak kat.

²¹ <<Kang a yà pa uza ká ashe nkun va oga iyám va ta i mat na ká mba ká te, uza i ba ká ìnagam pa ìzəng wa iyám inana mpat. Kákul iyám inana

iga òyege, na mmá mwa ishi ká kákúkul nzəng ká mmak òyalyal ìkpáng pa ìzəng ká ashe agbapchi gwang ká mmì, ká abo afal mmì mpyet ká kul iyam inana ìpir ìkùr,

²² ká iləkpar pa iparəm kat te ivan irúzùm pa iparəm, ivá uza ya i na, ìzəngtəng iga iyam inana nnap mbángbāng kang ìro iga iyam inana iga nshì.

²³ Kà nra ngga nñanne te, uza i ba ká oza ká kul nnàl ishi wò ùnəm uga mpyal awop ká anung Aghal Mbut ká mpyal àYawe.

²⁴ Unəm uga mpyal awop i ba ká ìnagam va ta ká afal mmì ká kul iyam inana mpat, te unəm uga mpyal awop i yichi oza wa iyam inana iga òyege ká mpyal àYawe.

²⁵ Unəm uga mpyal awop i pá ìnagam iyam inana mpat te i pá nchèchər i bàp ká achwang aga awó ari, ká ìfang ìnunggwan iga awó ari, ká ìfang ìnunggwan iga ashar ari ánəm va mí ga nnènal.

²⁶ Te unəm uga mpyal awop i zuk mmì nro ká awó wò aga apam.

²⁷ Unəm uga mpyal awop i pá ìfang wò iga awó ari ká ashe mmì va ká ashe awúwo apam kang i sháng mmì va ta ká ìfang wò nvang pa nfangshat ká mpyal àYawe.

²⁸ Ká ashe abo mmì va le ká awúwo te, unəm uga mpyal awop i bàp ká achwang aga awó ari ánəm va mmá ká ngga nnàl na, ká apal ìfəfang ìnunggwan iga awó ari, ká apal ìfəfang ìnunggwan iga ashar ari, ká atak va mmá nak nchər iyam inana iga mpat ká.

²⁹ Abo mmì va le ká ashe awó ánəm uga mpyal

awop te, uza i nak ka ishi ánəm va mí ga nnènal. Te unəm uga mpyal awop i mwa ishi ká kakúkul kà mpyal àYawe.

³⁰ Uza i yichi ìro ka ashe iyam va uza ya, ka ashe iləkpər kat te ivan iruzum.

³¹ İzəngtəng iyam inana iga nnap mbəngbəng kang izəngtəng iyam inana iga nshì nzəng ká iyam inana ipir ikùr. Te unəm uga mpyal awop i mwa ishi ká kakul ánəm va mí ga nnènal kà mpyal àYawe.

³² Nnap mpakpak nnà ta kakul ánəm va ká arwa nlak, kang à yà ká nkàm ngga mmwa iyam iga nnàl wò kat.>>

Oga nnap mpakpak kakul nnàl nzhi

³³ UYawe là ûMusa ká uHaruna pa,

³⁴ <<A yà pa ó tar mbin aKanana va mmami kà ngga nna á wó nva i yà nji wó, kang n nak arwa nlak ka ashe nzhi ká mbin va nji wó,

³⁵ unəm uga nzhi va ta i shet ûnəm uga mpyal awop pa, <Iyam iro nna à fa kà nzhi mi wa arwa.>

³⁶ Unəm uga mpyal awop i nak pa oza á wur iyam á fa ka ashe nzhi va ta kang uza i tar i ga na ô dər arwa va ta pa dóng, na kang iyam iro ka ashe nzhi va ta a yà ká mbyèt kat, nnà chit te unəm uga mpyal awop i tar đak pa ô dər nzhi va ta.

³⁷ Uza i dər arwa va ta pa dóng. Kang a yà pa arwa va ta ka izər nzhi bəp ndəng ipəpa kat te nrəzang, kang à bok tar azər nzhi,

³⁸ te unəm uga mpyal awop i fa ka ashe nzhi va ta i ga anung asal, kang uza i kuk nzhi va ta nra pa nfangshat.

39 Unəm uga mpyal awop i le kà nra ngga nfangshat kà dì, kang a dər pà dónḡ. Kang a yà pà arwa vā ta myak chit kà izər nzhi te,

40 unəm uga mpyal awop i nak pà mmá zèp oga ipáng vā ká arwa mmá swang kà atak aga adak kà nsəm ìtong.

41 Uza i nak mí pyár ashe nzhi vā ta pà chatchat, kang amè vā mmá pyár te mí swang kà atak aga adak kà nsəm ìtong.

42 Te oza i wur ipáng iro pà dì i mwàk kà atak imatmat vā, kang i wur mbin ngga nwòr nzhi i wòr nzhi vā ta ká kà dì.

43 <<A yà pà arwa vā ta fa kà ashe nzhi kà dì nvangvā uza zèp oga ipáng, pyár azər nzhi kang à wòr,

44 te unəm uga mpyal awop i tar i dər. Kang a yà pà arwa vā ta myak kà ashe nzhi, te arwa abángbàng, nzhi vā ta ká adak.

45 Te uza i chwan nzhi vā ta, kang ipé pang, nzəng ká akúkun, ká mbin nva mmá wòr ká, uza i wur i fa kà nsəm ìtong kà atak adak.

46 Unəm vā kpaktak tar ashe nzhi vā ta kà nra vā mmá kukùk, te i yà ká adak i ga i chu anung arurong.

47 Nza unəm nggo vā ra kà ashe nzhi vā ta te uza i nàl ìlukwan wò, ká uva ri iyam kà ashe nzhi vā ta te i nàl ìlukwan wò.

48 <<Kang a yà pà unəm uga mpyal awop dər nzhi vā ta, kang à ya pà arwa vā ta myak kà ashe nzhi vā ta kat, kà nvang nwùwór kà dì, te unəm uga mpyal awop i shet pà nzhi vā ta yà ká adak kat, kakul arwa vā ta tàn chit.

⁴⁹ Te uza i wur inyil pa iparəm, ká akun asida, ká afini bán pa gàr, ká azang ahisop, kakul nnàl adak nzhi va ta.

⁵⁰ Kang uza i pa ìnyil pa ìzəng ka ashe ngbət amè ka apal ndəng nnənan.

⁵¹ Uza i yar akun asida, ká azang ahisop, ká afini bán pa gàr, ká ìnyil ìrìrì i mwàk oza ka ashe nchər ìnyil va mmá pa ka apal ndəng nnənan, kang i shang nchəchər n̄zhi va ta nvaṅ pa nfangshat.

⁵² Uza i nàl adak nzhi va ta ká nchər ìnyil, ká ndəng nnənan, ká ìnyil ìrìrì, ká akun asida, ká azang ahisop, ká afini bán pa gàr.

⁵³ Te uza i re ìnyil ìrìrì va ta i fa i ga nsəm ìtong ka agbagba. Wa nnà ta uza i mwa ishi n̄zhi va ta, te i yà ká adak kat.>>

⁵⁴ Nnap mpakpak nà ta kakul nza apir arwa awá izər nggo, ká ndangbyat.

⁵⁵ Kakul nlak ngga izər ìlukwan, kat te ngga nzhi,

⁵⁶ kakul iyaṃ mmu, izər iwárwár, ká mbàp,

⁵⁷ kakul nnyi awalang va iyaṃ ká adak ká iga adak kat. Nnap mpakpak nà ta ka apal arwa nlak.

15

Nnap mpakpak ka apal nwàr asal apyal

¹ UYawe là ûMusa ká uHaruna pa,

² <<Là ôlsarila pa, a yà pa afən kà nwàr ûnungwan ka apyal te, nwùwar va ta nak na uza yà ká adak.

³ Nnà t_a i yà nnap mpakpak k_a apal adədak aga nwàr, mo te afən fa k_a apipyal k_at te á zwan apyal, te uza k_a adak.

⁴ Nza alyér nggo v_a unəm v_a k_a iyam iwárwàr a ra k_a te i yà k_a adak, kang nza iyam nggo v_a uza təm k_a te i yà k_a adak.

⁵ Nza unəm nggo v_a dok iyam nrəra te uza i nàl ilukwán wò kang uza i wòr izər k_a ashe ndəng, te uza yà k_a adak i ga i chu arurong.

⁶ Unəm v_a təm k_a apal nza iyam ntəm nggo v_a unəm uga iyam iwárwàr təm k_a, te uza i nàl ilukwán wò kang uza i wòr izər k_a ashe ndəng, te uza i yà k_a adak i ga i chu arurong

⁷ Nkpaktak unəm v_a dok izər ánəm uga iyam iwárwàr te uza i nàl ilukwán wò kang uza i wòr izər k_a ashe ndəng, te uza i yà k_a adak i ga i chu arurong.

⁸ A yà p_a unəm uga iyam iwárwàr súk nshí ûnəm uga adak k_at, te uza i nàl ilukwán wò kang uza i wòr izər k_a ashe ndəng, te uza i yà k_a adak i ga i chu arurong.

⁹ Nza nkòngkòng nggo v_a unəm uga iyam iwárwàr kwák te, i yà k_a adak.

¹⁰ Nza unəm nggo v_a dok iyam v_a k_a avəng ánəm v_a ta, te i yà k_a adak i ga i chu arurong, kang nkpaktak unəm v_a wur oza, te uza i nàl ilukwán wò kang uza i wòr izər k_a ashe ndəng, te uza i yà k_a adak i ga i chu arurong.

¹¹ Kang nza unəm nggo v_a unəm uga iyam iwárwàr i dok nzəng k_a nzwaktak awó wò k_a ashe ndəng k_at, te uza i nàl ilukwán wò kang uza i wòr izər k_a ashe ndəng, te uza i yà k_a adak i ga i chu arurong.

12 Te iyam inok amè va unəm uga iyam iwàrwàr dok te mí chwan, kang nza iyam inok iga akun nggo mí zwaktak ká ndəng.

13 <<Nvangva unəm uga iyam iwàrwàr tən ka atak iyam nwàr wò, te uza i kung nra pa nfangshat kakul nnyám ntàn wò, kang uza i nàl ilukwán wò. Kang i wòr izər wò ká ndəng nnənan, te uza i yà ká adak kat.

14 Kà nra ngga nnanne te uza i wur iləkpar pa iparəm kat te ivan iruzum pa iparəm, i ba ká kà mpyal àYawe ka anung Aghal Mbut, kang uza i na oza ûnəm uga mpyal awop.

15 Unəm uga mpyal awop i yichi oza, izəngtəng iyam inana nnap mbəngbəng, kang iro iyam inana iga nshì. Te unəm uga mpyal awop i mwa ishishi ká kà mpyal àYawe kakul iyam iwàrwàrwarwar.

16 <<A yà pa mpèng amar fa ûnunggwan ka izər, te uza i wòr izər wò pa chatchat ká ndəng, kang uza i yà ká adak i ga i chu arurong.

17 Nza ilukwan nggo kat te awá va mpèng amar dok te, mí nàl ká ndəng, kang i yà ká adak i ga i chu arurong.

18 A yà pa ununggwan ra ká uchar kang mpèng fa te, oza i wòr izər ká ndəng, kang oza i yà ká adak i ga i chu arurong.

19 <<A yà pa uchar ká nchər nva akpàr te, uza i yà ká adak nra pa nfangshat kakul akpəkpar, kang nkpaktak ununggwan va dok na te i yà ká adak i ga i chu arurong.

20 Nkpaktak iyam va uza ra ka apəpal ka awalang akpəkpar te i yà ká adak. Kang iyam va

uza tēm ka apəpal te i yà ká adak.

²¹ Nza unəm nggo va dok iyam nrəra te, uza i nəl ilukwan wò kang uza i wòr izər ka ashe ndəng, te uza i yà ká adak i ga i chu arurong.

²² Nza unəm nggo va dok iyam ntəm va uza tēm kà, te uza i nəl ilukwan wò kang uza i wòr izər ka ashe ndəng, te uza i yà ká adak i ga i chu arurong.

²³ A yà pa alyér kat te iyam ntəm va uza kà ntəm kà, uza dok te, i yà ká adak i ga i chu arurong.

²⁴ A yà pa unungwan ra ká na, kang akpəkar dok na, te uza i yà ká adak nra pa nfangshat, kang nza alyér nggo va unəm va ta ra ka apəpal te i yà ká adak.

²⁵ <<A yà pa nchər vāng ūchar nra pa nkyak, ka awalang akpəkar kat, kat te a watar nra akpəkar watar. Te uza i yà ká adak nkpaktak nra nvāng nchəchər wa nchər akpəkar, te uza i yà ká adak.

²⁶ Nkpaktak alyér va uza ra ka apəpal ka awalang aga nvāng nchəchər te i yà ká adak. Kang iyam va uza tēm ka apəpal te i yà ká adak, i yà wa nva ka awalang akpəkar.

²⁷ Nza unəm nggo va dok oza te i yà ká adak, te uza i nəl ilukwan wò kang uza i wòr izər ka ashe ndəng, te uza i yà ká adak i ga i chu arurong.

²⁸ Kà nvāng va nvāng nchəchər sat, te uza i kung nra pa nfanshat kang kà nvəvāng te uza i yà ká adak kat.

²⁹ Kà nra ngga nñanne te uza i wur iləkar pa iparəm kat te ivan iruzum pa iparəm, uza i ba ká oza ūnəm uga mpyal awop ka anung Aghal Mbut.

³⁰ Unəm uga mpyal awop i yichi izəngtəng iyam

inana nnap mbángbàng kang iro iyam inana iga nshì. Te unəm uga mpyal awop i mwa ishíshi ká kà mpyal àYawe kakul adak akpəkpər.

³¹ <<Wa nnà tã bu van oIsarila kã atak adak oza, le kang oza a kú kã atak adak oza kãt, kã nvyap nzhi mi va kã ishimshe oza.>>

³² Nnap mpakpak va tã kakul ánəm va kã iyam iwárwàr, kakul nza unəm nggo va mpèng amar vàng á na, á nak na uza yà kã adak,

³³ kãt te uchar va kã ngbał akpar, kakul ada nggo, ununggwan kãt te uchar, kang kakul ánəm va ra kã uchar va kã adak.

16

Ìlum iga mmwa ishi

¹ UYawe là nnàp kã uMusa kã nvàng ikú ovan aHaruna pã oparəm, nva oza ba mpyal àYawe kang oza kú á.

² UYawe là ûMusa pã, <<Là ûgənanğ bu uHaruna pã kang uza a ba ashe Atak Ayéryər kã nsəm atani, kã mpyal anung akwati aga nsar nnap-nlã kã awalang va uza dòm kãt, kãt te uza i kú. Kakul mi fa kã ashe ilulu kã apal anung akwati aga nsar nnap-nlã.

³ Asał va tã nà uHaruna i tar Atak Ayéryər, uza i tar kã iya ìna ìnunggwan kakul iyam inana iga nnap mbángbàng kã ìnagam kakul iyam inana iga nshì.

⁴ Uza i pá ìlukwan iga ashe iyéryər iga alinin, kang i yà kã ìnya nwondo ngga ashe ngga alinin kã izər wò. Uza i ran ngbàt alinin kang i sar ishi

ká iyam ishi iga alinin, iyam va ta ilukwan iyéryar. Uza i wòr izər wò ká ndəng kang uza i mwàk oza.

⁵ Uza i wur ibél inungwan pa iparəm ka atak mbut oIsarila kakul iyam inana iga nnap mbángbang, ká inagam pa izəng kakul iyam inana iga nshì.

⁶ <<UHaruna i na iya ina inungwan kakul iyam inana nnap mbángbang wò, kang i mwa ishi ká, kakul ishi wò, ká nzhi wò.

⁷ Nnà chit te uza i wur ibél iga iparəm va i ba ká kà mpyal àYawe ka anung Aghal Mbut.

⁸ Te uHaruna i mang ayàk ka apal ibél iga iparəm va ta, ayàk izəngtəng kakul áYawe kang iro kakul aAzazel*,

⁹ Uza ba ká ibél va mmá yàk ka atak mmang ayàk kakul áYawe, kang uza yichi wa iyam inana iga nnap mbángbang.

¹⁰ Te ibél va ayàk ru ka apəpal kakul aAzazel, mí yichi kà mpyal àYawe na mmá mwa ishi ká, na mmá re kakul aAzazel pa á ga ashe nzam.

¹¹ <<Te uHaruna i yichi ina inungwan iyam inana iga nnap mbángbang kakul ishi wò, kang i mwa ishi wò ká, ká nzhi wò, te uza i pà ina inungwan va ta iyam inana iga nnap mbángbang kakul ishishi.

¹² Te uza i yar asu apər yél ká amor apər ka atak nshì iyam awop kà mpyal àYawe, ká mməm nnəngnəng mma awó pa aparəm pa sūr, kang i ba ká ka ashe atani.

* **16:8 16.8** aAzazel Ìpir aAzazel te mmá nyi kat. Dòm te i yà ađin atak, ađin nzhənggol, kat te ađin mbit.

13 Uza i nak mməm nnéngnəng va ta ka apal apər kà mpyal àYawe, kakul na nggù mməm va ta á dàngchi apal anung akwati aga nsar nnap-nlà, le kang uza a kú kat.

14 Kang uza i pá nchər ìna ìnunggwan va ta kang i sháng ká ìfang wò kà izər anung akwati aga nsar nnap-nlà kà asal nfa alum, kang uza i sháng nchər va ta ká ifang wò kà mpyal anung akwati aga nsar nlà nvang pa nfangshat.

15 <<Nnà chit te uza i pà ìbəl iyam inana iga nnap mbángbàng kakul onəm. Kang i ba ká nchəchər kà ashe atani, te uza i nəm iyam izəngtəng ká nchəchər wa nva uza nəm ká nchər ìna ìnunggwan. Uza i sháng kà izər apal anung akwati aga nsar nnap-nlà ká mpipyal.

16 Uza i mwa ishi Atak Ayéryər ká kakul adak oIsarila ká mpat oza, ká nkpaktak nnap mbángbàng oza. Wa nnà ta kpa uza i nəm ká Aghal Mbut va kà ishimshe adak oza.

17 Kang unəmləbər uro i yà kà ashe Aghal Mbut kat, kà awalang va uza i tar pa ô mwa ishi kà ashe Atak Ayéryər, ya uza i fa kang. Uza i mwa ishi wò ká, ká ishi nzhi wò, ká ishi nkpaktak oIsarila.

18 Te uza i fa atak nshì iyam awop va kà mpyal àYawe kang i mwa ishi kakúkul, te uza i dok nchər ìna ìnunggwan ká nchər ìbəl i jen nggùnggúng atak nshì iyam awop ká i gang.

19 Uza i sháng nchər nro ká ìfang wò kà apəpal nvang pa nfangshat i gòr na kakul adak oIsarila.

20 <<Nvangva uza gba ká nggòr Atak Ayéryər, Aghal Mbut, kà atak nshì iyam awop, te uza i yichi

ká ìbèl ìrìrì vā ta.

²¹ UHaruna i nak nkpaktak awó wò kà apal ishi ìbèl ìrìrì vā ta, kang i pwa nkpaktak nnap mbángbàng, mpat, ká adak oIsarila kà apəpal. Te uza i nak oza kà apal ishi ìbèl vā ta kang i re kà ashe awó ánəm uro i ga ashe nzam.

²² Ìbèl vā ta i yar nkpaktak nnap mbángbàng oza kà ishi wò, te uza i re ìbèl vā ta i ga ashe nzam va unəm uro yà kà kat.

²³ <<Te uHaruna i tar ashe Aghal Mbut, kang i zèp ilukwan alinin vā uza mwàk kà ilum vā uza tar Atak Ayéryər á, uza i re oza kà ta.

²⁴ Uza i wòr izər wò ká ndəng kà Atak Ayéryər kang i mwàk ilukwan ijì wò. Te uza i fa agbai kang i yichi iyəm inana iga nshì kakul ishi wò ká iyəm inana iga nshì kakul ishi onəm, te uza i mwa ishi ká kakul ishi wò ká onəm.

²⁵ Uza i shì mpip iyəm inana iga nnap mbángbàng kà apal atak nshì iyəm awop.

²⁶ Unəm uga nré ìbèl aAzazel i nàl ilukwan wò kang i wòr izər ká ndəng, nnà chit te uza i tar ashe apak dak.

²⁷ Ìna iyəm inana iga nnap mbángbàng ká ìbèl iyəm inana iga nnap mbángbàng, vā mmá ba ká nchər oza kà ashe Atak Ayéryər pā mmá mwa ishi ká, te uza i fa ká kà nsəm apak. Awá oza, ká izhe oza, ká iyəm afu oza, mí shì ká apər.

²⁸ Unəm vā shì oza te uza i nàl oga ilukwan wò kang i wòr izər ká ndəng, nnà chit te uza i tar ashe apak dak.

²⁹ <<Iyəm vā ta i yà nnap mpakpak kà atak wó mbyet. Kà nra ngga ngbapchi kà ape aga

afangshat, te ó ɖat ishi wó, kang ó nəm inok iro kat, uyen uga mbin ká unəm uchən va kà ishimshe wó.

³⁰ Kākul kà ìlum va ta mí ga mmwa ishi wó pa á nàl wó kà atak nkpaktak nnap mbángbàng. Na ó yà ká adak kat kà atak nkpaktak nnap mbángbàng kà mpyal àYawe.

³¹ Ìlum aSati ayéryər kākul wó, te ó ɖat ishi wó. Nnap mpakpak mbyet mbyet.

³² Unəm uga mpyal awop uva mmá gor kang mmá nak awo a na pa á nəm inok wa ánəm uga mpyal awop uchumchum kà ador apupo. Te uza i mwa ishi, kang i mwàk oga ilukwan alinin, oga ilukwan iyéryər.

³³ Te i mwa ishi Atak Ayéryər va ji pa kpaktak, ká Aghal Mbut, ká atak nshì iyam awop, kang uza i mwa ishi kākul onəm oga nshì iyam awop ká nkpaktak mbut.

³⁴ Iyam va ta i yà nnap mpakpak kākul wó mbyet mbyet, pa mmá mwa ishi oIsarila nvang pa nzəng kà ashe izun kākul nkpaktak nnap mbángbàng oza.>> Te uza nəm wa nva uYawe nak.

17

Atak va mmá yichi iyam inana kà

¹ UYawe là ûMusa pa,

² <<Là ûHaruna ká ovəvan onungwan ká nkpaktak oIsarila, là ôza pa. Nnap va ta uYawe nak, pa,

³ nza unəm nggo va kà nzhi àlsarila pà ina inungwan, kat te inagam, kat te ibəl ka ashe apak, kat te á pà kà nsəm apak,

⁴ kang uza ba ká ka anung Aghal Mbut pa ô yichi iyam inana ûYawe kà mpyal atak ntəm àYawe kat, te mí nap akwali ntar nchər ûnəm va ta. Uza tar nchər, kakul nva ta te mí fa ká na ka ashe onənəm.

⁵ Kakul pa na á dang oIsarila kà nyichi nləfər iyam ipápà va oza i pà ka agbagba. Na á nak oza á ba ká nləfər ûnəm uga mpyal awop ka anung Aghal Mbut, na uza á yichi ûYawe wa nləfər iyam inana iga ntəm ikánkáng.

⁶ Unəm uga mpyal awop i sháng nchəchər ka apal atak nshì iyam awop aYawe ka anung Aghal Mbut, kang i shì mpìpip iyam inéngnəng ichángchàng ûYawe.

⁷ Oza i yà ká nyichi nləfər iyam ipápà iro ôga ichər va wa ibəl lap kat, iva oza nəm mmai ká oza. Nnap mpakpak va ta i yà kakul oga nlwàk oza mbyet mbyet.

⁸ <<Là ôza pa, nza unəm nggo kà nzhi àlsarila kat te ka ashe onəm ochən va təm ka ashe oza, uva i yichi iyam inana iga nshì kat te nza apir iyam inana nggo,

⁹ kang à ba ká ka anung Aghal Mbut pa ô yichi ûYawe kat, te mí fa ká na ka ashe onənəm.

¹⁰ <<Nza unəm nggo kà nzhi àlsarila kat te ka ashe onəm ochən va kà ntəm ka ashe oza i ri nchər nro te, mi nak iwú kà unəm va ri nchər, kang mi fa ká na ka ashe onənəm.

¹¹ Kakul irirì izhe ka ashe nchəchər na, kang n

na wó chit pa mmá mwà ishi ká ka apal atak nshì
iyam awop kakul irirì wó, kakul nchèr na i yar
nnap mbángbang wó.

¹² Kakul nva ta te, n là ôlsarila chit pa, kang
unəm uro ka ashe wó, ka te unəm uchən va təm
ka ashe wó a ri nchər ka.

¹³ <<Nza uIsarila nggo ka te unəm uchən va
təm ka ashe oza, uva i gba izhe ka te inyil va mí
riri te, uza i wàr nchəchər kang i dəp ká mbin.

¹⁴ Kakul irirì izhe ka ashe nchəchər. Kakul nnà
kang n là ôlsarila pa, ó yà ká nrí nchər izhe ìro ka.
Kakul irirì nza izhe nggo te ka ashe nchəchər, nza
unəm nggo va ri te mi fa ká na.

¹⁵ Nza unəm nggo uyen uga mbin ka te unəm
uchən, uva ri iyam ikuku ka te izhe iga anyin à
kan te, uza i nàl ilukwan wò kang i wòr izər ká
ndəng, te i yà ká adak i ga i chu arurong, nnà chit
te uza i yà ká adak ka.

¹⁶ Kang a yà pa uza nàl oza ka, ka te uza wòr
izər wò ka, te uza i yar mpat wò.>>

18

Nnap mpakpak ka apal nnəm mmai

¹ UYawe là ûMusa pa,

² <<Là nnàp ká oIsarila, là ôza pa, mmami
uYawe, Inan wó.

³ Kang ó yar nnap nnəm ngga mbin aMasar ka,
atak va ka ó təm kà, ka te ó yar nnap nnəm ngga
mbin aKanana ka, atak va mmami kà ngga ká
wó kà. Ó yà ká nkpak nnap mpakpak oza ka.

⁴ Ó kpak oga nnap mpakpak mi, kang ó nak ishi ká ndyáng mi. Mmami uYawe, Inan wó.

⁵ Ó kpak oga ndyáng mi ká nnap mpakpak mi. Kakul Unəm i lár a yà pa_ uza_ kpak oza_ á. Mmami na uYawe.

⁶ <<Unəm i yà ká mba ndát ká_ unàl wò pa_ ô ra ichar ká_ na kat. Mmami na uYawe.

⁷ Kang wá na iwuswa ũpo bu ka_ atak nra ká unang bu kat, uza_ unang bu, kang wa ra ká na kat.

⁸ Kang wa ra ká uchar àpo bu kat, i na iwuswa ũpo bu.

⁹ Kang wa ra ká ugənanang bu uyen uchar kat, uya àpo bu uyen uchar kat te uji ànang bu uyen uchar, mmá mar kà nzhi kat te kà nzam, kang wa ra ká oza_ kat.

¹⁰ Kang wá ra ichar ká_ uya ayen bu ununggwan kat, kat te uya ayen bu uyen uchar kat, kakul i na iwuswa á bu.

¹¹ Kang wa ra ichar ká_ uya ànangzhi bu kat uva_ upo bu à mar. Uza_ ugənanang bu.

¹² Kang wa ra ichar ká_ ugənanang àpo bu kat. Uza_ unàl bu uga ndatkulung.

¹³ Kang wa ra ichar ká_ ugənanang ànang bu kat, kakul uza_ unàl ànang bu uga ndatkulung.

¹⁴ Kang wá na iwuswa ũgənanang àpo bu ka_ atak nra kà uchəchar kat. Uza_ unang bu.

¹⁵ Kang wa ra ichar ká_ ukà bu kat, uza_ uchar àyen bu.

¹⁶ Kang wa ra ichar ká_ uchar àgənanang bu kat. I na iwuswa ũgənanang bu.

¹⁷ Kang wa ra ichar ká_ uchar ká_ uyiyen kpa kat. Kang wa ra ichar ká_ uya àyiyen ununggwan,

kaṭ te uya àyiyen uyen uchar kaṭ, oza onal bu oga ndatkulung. Abəkət ta.

¹⁸ Kang wa kaṃ ichar ká ugənanang àchar bu a taḷ ukpəkpət, ya ugənananggənanang uwa yà ká irirì kaṭ.

¹⁹ <<Kang wa ram ichar kà uchar ka awalang va uza ká akpar kaṭ.

²⁰ Kang wa ra ichar ká uchar àwan bu kaṭ, bu vyap ishi bu ká na.

²¹ Kang wa na uyen bu uro nləfər înan va mi wor pa uMolek, kaḱul i vyap adin Inan bu. Mmami na uYawe.

²² Kang wa ra ká ununggwān wa nva unəm i ra ká uchar kaṭ, iyaṃ iga ajan.

²³ Kang wa ra ichar ká iyaṃ nkang na ú vyap ishi bu kaṭ. Kang uchar á na izər wò iyaṃ nkang kaṭ te izhe iga anyin pa á ra ká wò kaṭ. Nva ta adak.

²⁴ <<Kang ó vyap ishi wó ka atak oga nnap nnəm va ta kaṭ, kaḱul nkpaktak oga iyaṃ va ta mbín va mmami kà ngga mbàk i le á wó, nak ishi oza yà ká adak.

²⁵ A nak te mbin vyap, kang n nyám ntàn á na kaḱul mpəpat, te mbin va ta yang ká onəm oga ntəm ka ashe wò.

²⁶ Te ó kpak oga ndyáng mi ká oga nnap mpakpak mi. Kang ó nəm oga iyaṃ iga nnəm ajan va ta kaṭ, ko uyen uga mbin kaṭ te unəm uchən va kà ntəm ka ashe wó.

²⁷ Kaḱul onəm va ka yà ka ashe mbin va ta mpyal wó te, ka nəm nkpaktak oga iyaṃ iga ajan va ta, kang mbin yà ká adak.

²⁸ A yà pa ó vyap mbin va ta te i yang ka wó wa nva ka nyang mbín va ka yà mpyal á wó.

29 Nza unəm nggo uva nəm iro ka ashe oga iyam iga ajan va ta te, mí fa ká unəm va ta ka ashe onənəm.

30 Te ó kpak ndyáng mi na kang ó nəm oga iyam iga ajan iva mmá nəm chit ka mbin va ta mpyal wó kaṭ, le kang ó nak ishi wó a yà ká adak ka atak oza kaṭ. Mmami na uYawe, Inan wó.>>

19

Oga nnap mpakpak

1 UYawe là ûMusa pa,

2 là nkpaktak mbut oIsarila pa, <<Ó yà onənan kakul mmami, uYawe, Inan wó, mmami unənan.

3 Nza uzəngtəng wó nggo á kpak nnap nnəm ûnang wò ká upo wò, kang ó kpak ilum aSati mi, mmami na uYawe, Inan wó.

4 Kang ó le atak oga ichər, kaṭ te ó nəm alaḱan aga ichər kaḱul ishi wó kaṭ. Mmami na uYawe, Inan wó.

5 <<A yà pa ó yichi nləfər iyam ipápà iga ntəm ikáŋkáng ûYawe, te ó yichi ka asal va məma, na á yà ikamkam.

6 Mí ri izhe va ta nda va mmá pà ká, kaṭ te kà ipin ikpakpak. Kang abubo va le kà ilum iga ishatding te, mkpak mí shi ka ashe apər.

7 A yà pa mmá ri kà nra ngga nshatding te, i yà izhe iga ajan, mí kam kaṭ.

8 Unəm va ri te uza i yar idək mpat wò, kaḱul uza vyap iyam iyéryər va iji áYawe. Unəm va ta mí fa ká na ka ashe onənəm.

⁹ <<Kang a yà pà ó bèn iyam mbin wó te, kang wa bèn anung ìram bu kaṭ, kang wa chák nvaṅ iyam mbèn bu kaṭ.

¹⁰ Te kang wa chák nvaṅ ìram ibangbang kaṭ te wa wur oga awúwar va tàk kà mbin pà chatchat kaṭ, re oza kakul onəm oga nkun ká odyànəm. Mmami na uYawe, Inan wó.

¹¹ <<Kang ó nəm ayí kaṭ. Kang ó lam atak kaṭ. Kang ó nap akwam kaṭ.

¹² Kang ó sòng anung aga akwam ká adin mi kaṭ, na kang ó vyap adin Inan wó. Mmami na uYawe.

¹³ <<Kang wa kàr kaṭ te wa vyat uwan bu kaṭ. Kang amwa ánəm va u yar ka inok a ra ká awó bu a chu ipin kaṭ.

¹⁴ Kang wa pwat unəm va achwang kpəkpəng ká na kaṭ te wa nak iyam iga nlèp ifang kà mpyal ànəm ufofo kaṭ. Te ra ayər Inan bu, mmami na uYawe.

¹⁵ <<Kang wa nəm nlang nnandər ká ashe nnáp akwali kaṭ. Kang wa nyám ndòm ishi ûnəm uga nkun kaṭ te wa dóm nnap ànəm uga ndur na a ji kaṭ. Nap akwali ôwan bu ká nnandər.

¹⁶ Kang wa chen ká nnáp akwam ká apal anəm uro kaṭ, kang wá nak irirì áwan bu ká ashe ndaktak kaṭ. Mmami na uYawe.

¹⁷ <<Kang wa yang ugənanng bu ká ashe igwak kaṭ. Ran ká uwan bu ká nnandər, na kang nnap mbángbangbangbang á məl bu kaṭ.

¹⁸ Kang wa pyát kaṭ te wa bul ká onəm bu kaṭ, man uwan bu wa ishi bu. Mmami na uYawe.

¹⁹ <<Ó kpak oga ndyáng mi. Kang ó re iyam nkang a kpàm apir aro pà dī kaṭ, kang ó suk ìram

wó ká apir iyam nsuk pa iparəm kat, kat te ó pá ilukwan iga apir atani pa dongdong kat.

20 <<A yà pa unəm ra ichar ká uyen uchar uzwal uva unəm uro kà nnəm nggya ká kang nna mmá kam ishishi kat te mmá fən na chit kat, te mí pyat akəkat. Mí yà ká ngbáng oza kat, kakul uza uwa ya nfən chit kat.

21 Te unəm va ta i ba ká inagam iyam inana iga mpat, ka anung aghal aga mbut ũYawe.

22 Unəm uga mpyal awop i mwa ishishi ká inagam iyam inana iga mpat kà mpyal àYawe, kakul nnap mbángbang va uza nəm, te mí yar nnap mbángbangbangbang va uza nəm.

23 <<A yà pa ó táng ashe mbin va ta kang ó bál nza ikún nggo kakul nrí, te ó dər awúwar ká ajan, izun pa ishatding i yà ká ajan ka atak wó, mí rí kat.

24 Ka ashe izun iga ineding te, nkpaktak awúwar mí gar kakul iyam inana ashep ũYawe.

25 Kang ka ashe izun iga itukun te ó ri awúwar. A yà pa ó nəm pa te, oga ikun wó iwár awár pa makmak. Mmami na uYawe, Inan wó.

26 <<Kang ó ri iyam iga nchər kat. Kang ó nəm ivak kat, kang ó nəm mmàm kat.

27 Kang ó káp akum ishi wó ka asal isu kat, kat te ó kpat nggyer wó kat.

28 Kang ó kyen izər wó kakul akúm kat, kat te ó cha nzaṃ ka izər wó kat. Mmami na uYawe.

29 <<Kang wa vyap ovan bu ovan ochar ka atak nnak oza kà nnəm mmai kà nzhi awop inan kat, a yà pa ó nəm pa te o gaḃan ka atak inan iro kang mbin yəl ká mmai.

³⁰ Ó kpak ìlum aSati mi kang ô rup ká atak awop mi. Mmami na uYawe.

³¹ <<Kang ó ga atak onəm oga ivak kat te aruhu onəm okukù na á nak wó ó vyap kat. Mmami na uYawe, Inan wó.

³² <<Ó kpak nnap nnəm ônəm vạ ya nra chit, ó na ichumchum ônəm gbák, kang ô ra ayər Inan wó. Mmami na uYawe.

³³ <<A yà pạ unəmchən ra nzəng ká wó kạ ashe mbin wó te, kang ó kàr na kat.

³⁴ Ó nəm ûnəmchən vạ ra kạ ashe wó wa áyen uga mbin, ó maṇ na wa nva ó maṇ ishi wó, kạkul kạ ó yà onəmchən kạ ashe mbin aMasar. Mmami na uYawe, Inan wó.

³⁵ <<Kang ó kàr onəm ká iyam iga mmàl iyam iga kwam kat, kạ awalang vạ mmawó kà mmàl mbal, idək, kat te iyəl iyam.

³⁶ Re o iyam iga mmàl idək, ká ìkpáng iga mma iyam, ká iga mma iyam igálákgàlæk a yà iga nnandər. Mmami na uYawe, Inan wó, uva fa ká wó kạ mbin aMasar.

³⁷ Ó kpak nkpaktak oga ndyáng mi ká nkpaktak oga nnap mpakpak mi, o nak ishi ká oza. Mmami na uYawe.>>

20

Mpyat nnap mbángbàng

¹ UYawe là úMusa pa,

² là ôlsarila pa, <<Nza uIsarila nggo, kat te unəmchən va kạ ntəm kạ ashe aIsarila, uva i na uyen wò uro ìnaṇ va mi wor pạ uMolek, te nkpak uza i kú ikúku. Onəm oga mbin vạ ta i kwàn na ká ipáng.

³ Mi yang unəm vā ta, mi fa ká na kà ishimshe onənəm kakul uza yichi ovan wò ûMolek, uza nak nzhi mi nyéryər yà ká adak, kang uza vyap adín mi ayéryər.

⁴ Kang a yà pā onəm oga mbin vā ta kùk iwú oza ká awalang vā unəm vā ta na uyen wò ûMolek, kang oza gbaḽ na kaṭ,

⁵ te mi yang unəm vā ta ká akukum, mi fa ká oza ká ashe onəm oza, ká nkpaktak onəm vā yar nvəvāng kakul oza nəm mmai ká uMolek.

⁶ <<Nza unəm nggo vā ga atak onəm oga ivaḽ, ká aruhu onəm okukù, te mi nak iwú mi ká apal ánəm vā ta, kang mi fa ká na ká ashe onənəm.

⁷ Ó gar ishi wó, ó yà onənan, kakul mmami na uYawe, Inan wo.

⁸ Ó kpak oga nnap mpakpak mi, ó nak ishi ká oza. Mmami na uYawe, uva gar wó.

⁹ Nza unəm nggo vā pwat upo wò ká unang wò, te nkpak mí gbaḽ na. Kakul uza pwat upo wò ká unang wò te, nchər oza i ya ká ishishi.

¹⁰ <<A yà pā unəm ra ichar ká uchar àwan wò, te nkpak mí gbaḽ unəm uga nnəm mmai ká uchar uga nnəm mmai vā ta.

¹¹ A yà pā unəm ra ichar ká uchar àpo wò, te uza na iwuswa ūpo wò. Nkpak mí gbáng mparəm oza, nchər oza ká ishi oza.

¹² A yà pā unəm ra ichar ká uchar àyen wò, te nkpak mí gbáng mparəm oza. Oza nəm iyam iwuswa, kang nchər oza ká ishi oza.

¹³ A yà pā ununggwan ra ichar ká ununggwan uwan wò, te oza nəm iyam iga ajan. Nkpak oza i kú ikúku, nchər oza ká ishi oza.

¹⁴ A yà pà unəm kām uchar nzəng ká unənanğ te, á byen kat. Mí shì nkpaktak oza, le kang abəkət a yà ká ashe wó kat. Apir nnap nnəm vā ta ma pā a yā ká ishimshe wó kat.

¹⁵ A yà pà unəm ra ichar ká iyām nkang, te nkpak uza ká iyām nkang vā ta oza i kú ikúku.

¹⁶ A yà pà uchar ra ichar ká iyām nkang, te mí gbał uchar vā ta ká iyām nkang vā ta, nchər oza ká ishi oza.

¹⁷ <<A yà pà unəm kām ugənanğ wò, uya àpupo kat te uya ànənanğ, kang oza ra ichar, te iyām iwuswa. Mí bak oza mbang kà iwú onəm oza, kakul uza ra ichar ká ugənanğ wò. Oza i yar mpat oza.

¹⁸ A yà pà unəm ra ichar ká uchar vā ká akpar te, nnap mbángbang. Oza kpak nnap mpakpak àYawe kat. Mí bak mparəm oza ká ashe onəm oza.

¹⁹ Kang wa ra ichar ká ugənanğ ànanğ bu kat te ugənanğ àpon bu kat, kakul i yà mpwa imaləng á nàl bu uga ndátkulung. Oza i yar mpat oza.

²⁰ Unəm vā ra ichar ká uchar àkyaan wò te uza na iwuswa úkyaan wò. Oza i yar mpat oza, oza i kú, i yà ká nvəng kat.

²¹ A yà pà unəm kām uchar àgənanğ wò, ya uwa yà ká iriri te adak. Uza na iwuswa úgənanğ wò, oza i yà ká nvəng kat.

²² <<O kpak nkpaktak oga ndyáng mi ká oga nnap mpakpak mi, kang ô nak ishi ká oza, le kang mbin vā mmami ká ngga ká wó ká a yang wó kat.

²³ Kang ó yar nnap nnəm ngga mbin vā mmami ká ngga mbàk oza ká mpyal wó kat. Kakul oza nəm nkpaktak oga iyām vā ta, kang n yang oza.

²⁴ Kang n yar nsar nnap-nlà á wó pa, <Ó ga nkam mbin oza, kakul mi ga nnəna á wó i yà iyam akúp wó, mbin va ndopdop.> Mmami na uYawe, Inan wó va gar wó ka ashe aboshi mbin.

²⁵ Kakul nva ta te, ó van ishimshe iyam nkang inənan ká ivəngva inənan kat, ká ishimshe inyil inənan ká ivəngva inənan kat. Kang ó vyap ishi wó ka atak izhé, inyil, ká nza iyam iga nkpàng kà mbin nggo kat. N van iva ta chit iga adak va byen kakul wó kat.

²⁶ Ó yà onənan ka atak mi kakul mmami, uYawe, unənan, kang n gar wó ka ashe onəm pa ó yà oji mi.

²⁷ <<Ununggwan kat te uchar uva i nəm ivak kat te i ram aruhu onəm okukù te, nkpak mí kwan oza ká ipáng i kú, nchèr oza ka ishi oza.>>

21

Oga nnap mpakpak kakul onəm oga mpyal awop

¹ UYawe là ûMusa pa, <<Là ôvan aHaruna, onəm oga nshì iyam awop pa, <Kang unəm uro a vyap ishi wò ka atak ndok akúm ka ashe onəm wò kat,

² yà unənal uga ndátkulung ká na wa unənan, upupo, uyiye ununggwan, uyiye uchar, kat te ugənanggənan chwat,

³ kat te ugənanggənan uye byen uva uwa à vág chit kat. Kakukul te uza i nak ishi wò i yà ká adak.

⁴ Kang uza a nak ishi wò a yà ká adak ka ashe onənal achəchar kat.

⁵ << <Onəm oga mpyal awop i yà ká nkpat ishi igbatəng kaṭ, i kpat nggyer kaṭ te i cha izər oza kaṭ.

⁶ Oza i yà onənan ka atak Inan oza, kang oza i vyap adin Inan oza kaṭ, kakul oza i yichi iyam inana iyam-nrì uYawe, Inan oza, te oza á yà onənan.

⁷ << <Kang oza a kam ochar omaimai, kaṭ te uva ubəbar á gbaḷ ivang á na, kakul onəm oga nshì iyam awop oyéryər Inan oza.

⁸ Ó dər na unənan kakul uza kà nyichi iyam inana iyam-nrì Inan wó. Uza i yà unənan kà mpyal wó, kakul mmami uYawe uva gar wó, mmami unənan.

⁹ A yà pa uya ənəm uga mpyal awop uyen uchar nnəm mmai, te uza yen ká upo wò, mí shì na ka apər.

¹⁰ << <Unəm uchumchum onəm oga mpyal awop ka ashe ogənanang wò, uva mmá zuk mmì ngga nggòr ka ishishi, kang mmá nak awó á na chit pa á mwàk ilukwan, te uza i kpat ishi, kaṭ te i kan ilukwan wò kaṭ.

¹¹ Kang uza a ga a dát ká akúm ənəm uro kaṭ, aji apupo kaṭ te unənanang, kakul kang uza a vyap ishi wò kaṭ.

¹² Kang uza a re Atak Ayéryər kaṭ, kakul kang uza a vyap Atak Ayéryər Inan wò kaṭ, kakul nggar ngga mmì ngga nggòr Inənan nna à yà ka apəpal. Mmami na uYawe.

¹³ << <Uza i kam uchar uva uwa à nyi ununggwān chit kaṭ.

¹⁴ Uza i kam uchar ukpələng kaṭ, uga ngbaḷ ivang, kaṭ te umaimai kaṭ. Uza i kam uyen byen

uva_uwa à nyi unungwan chit kaṭ ka ashe onəm wò,

¹⁵ le kang uza a vyap akùm wò ka ashe onəm wò kaṭ. Mmami na uYawe, uva gar na.> >>

¹⁶ UYawe là nnap ûMusa pa,

¹⁷ <<Là ûHaruna pa, kang unəm uro ka akum wó, ka ashe nkpaktak nlwák wó uva ká mbyèt a ba a dát pa ô yichi iyam inana iyam-nrì Ínan wò kaṭ.

¹⁸ Kang unəm uga mbyèt a ba a dát, unəm ufofo, ugurum, á vyap ka asal awú, kaṭ te lèlák,

¹⁹ kaṭ te unəm uva ashar kaṭ te igwal bækchi bækchi ká na,

²⁰ kaṭ te ìdada asəm, kaṭ te uyenyen, kaṭ te iwú nak ikùr, kaṭ te arwa aga nwár izər, kaṭ te anunur, kaṭ te unəm va atutultutul lèlák.

²¹ Kang unəm uro ka akum aHaruna unəm uga mpyal awop uva ká mbyèt a ba a dát pa ô yichi iyam inana iyam-nrì ûYawe kaṭ.

²² Uza i ri iyam-nrì Inan wò iva iyéryər va ji, ká iyéryər ri.

²³ Ká nnà te uza i yà ká ngga ndát ká atani kaṭ te á ba á datkulung ka atak nshì iyam awop kaṭ, kakul mbyèt ka izəzər. Kang uza a vyap Atak Ayéryər mi kaṭ, kakul mmami na uYawe, uva nàl oza.>>

²⁴ Wa nnà te uMusa là ûHaruna ká ovəvan ká nkpaktak oIsarila.

22

Iyam inana ikamkam

¹ UYawe là ûMusa pa,

² << Là ûHaruna ká ovəvan pa oza á nak ishi ká oga iyam inana iyéryər oIsarila, iva oza gar kakul mi, le kang oza a vyap adin mi ayéryər kať. Mmami na uYawe.

³ Là ôza pa, <A yà pa nza unəm nggo ka akum wó ka ashe nkpaktak oga nlwàk wó uva ká adak kang à ba à dát ká iyam inana iyéryər va oIsarila gar ûYawe, te mí fa ká unəm va ta kà mpyal mi.> Mmami na uYawe.

⁴ << <Kang unəm uro ka akum áHaruna uva ká arwa ka izər, kať te iyam kà nwár á na ka izər, te i ri ka ashe iyam inana iyéryər va ta kať, ya uza i tàn kang. Nza unəm nggo uva dok iza nggo va ká adak, kať te akúm, kať te unəm va mpəng amar wár á na, te uza ká adak

⁵ kať te unəm dok iyam iga nkpàng ká afu iva i nak uza i yà ká mbyèt kať te á dok unəmləbər uva i nak uza i yà ká adak, adədak a yà iza nggo.

⁶ Unəm uga mpyal awop va dok iza nggo ka ashe iyam va ta, te uza i yà ká adak i ga i chu arurong, kang uza i yà ká nrí ka ashe iyam inana iyéryər kať, ya uza i wòr izər wò ká ndəng kang.

⁷ Nvəngva alum tar chit, te uza i yà ká mbyèt kať, nnà chit te uza i ri ka ashe oga iyam inana iyéryər va, kakul iyam-nriri.

⁸ Kang uza a ri izhe iyam ikuku kať, kat te iva iyam iga anyin à kan, le kang uza a yà ká adak. Mmami na uYawe.

⁹ << <Onəm oga mpyal awop á kpak ndyáng mi, le kang oza a yà ká mpat kang oza i kú kakul nvivyp kať. Mmami na uYawe, uva gar oza.

¹⁰ << <Unəm ugafak i ri ka ashe iyam inana

iyéryər kaṭ. Unəmchən kaṭ te unəm va mmá yar na ka inok i ri iyām inana iyéryər kaṭ.

¹¹ Kang a yà pā unəm uga mpyal awop yap uzwal ká mbwai wò, kaṭ te amar aga nzhízi te uza i ri iyām-nriri ri.

¹² A yà pā uya ánəm uga mpyal awop uyen uchar vág ká unəm ugafak te, uza i yà ká nri ka ashe iyām inana iyéryər va ta kaṭ.

¹³ Kang a yà pā uya ànəm uga mpyal awop uyen uchar tēm uchar ukpələng kaṭ te gbaḷ ivang, kang à yà ká ovan kaṭ, te uza le nzhi àpo wò wa nva ká ivanbyen, te uza i ri iyām-nri apo wò ri. Unəm ugafak i ri kaṭ.

¹⁴ << A yà pā unəm va unəm uga mpyal awop kaṭ, ri iyām inana iyéryər ka ashe mpat, te uza i na uzəng ka apal atukun ngga mmak iyām va ta kang uza i yichi iyām inana iyéryər ûnəm uga mpyal awop.

¹⁵ Kang onəm oga nshì iyām awop a vyap oga iyām inana iyéryər va oIsarila na ûYawe,

¹⁶ na kang á nak oza ká nnəm mpat ngga amwa kakul pā oza ri iyām inana oza iyéryər kaṭ. Mmami na uYawe, uva gar oza.> >>

¹⁷ UYawe là ûMusa pā,

¹⁸ << Là ûHaruna ká ovəvan ká nkpaktak oIsarila, là ôza pā, <Nza unəm nggo ka ashe nzhi àlsarila, kaṭ te ka ashe onəmchən va yichi iyām inana iga nshì pā dwot, kakul nyar nsar nnap-nlà oza kaṭ te iyām inana iga ndòm igwak. Iyām nkang va ta i yà ká mbyèt kaṭ.

¹⁹ A yà pā uza dom pā iyām inana va ta a yà ikamkam te, mkpak i yà ina inungwan, kaṭ te

ìnagàm, kaṭ te ibèl ìnunggwan iva yà ká mbyèt kaṭ.

²⁰ Kang ó yichi iyam inana iyam nkang iva ka mbyèt kaṭ, kaḱul i yà ikamkam kaṭ.

²¹ A yà pa unəm yichi nləfər iyam ipápà iga ntəm ikánkáng ûYawe pa ô yél nsar nnap-nlà kaṭ te iyam inana iga ndòm ìgwak, ka ashe ina kaṭ te iyam nkang, te nkpak pa á yà ká mbyèt kaṭ, kaḱul na á yà ikamkam.

²² Kang ó yichi iyam inana ûYawe ká iyam nkang ifofo, kaṭ te ibəkchibəkchi, ká igùrum, kaṭ te iva iyam i wár á na ka izər, kaṭ te ndangbyat. Ó yà ká òyichi oga iyam va ta wa iyam inana iga apər ûYawe ka apal atak nshì iyam awop kaṭ.

²³ Ó yichi iyam inana iga ndòm ìgwak ká ìna kaṭ te itám iva ngbəgbək nro wuwang kaṭ te á agəptənggəptəng. Mi yà ká nkəkam kaḱul iyam inana iga nsar nnap-nlà ji wò kaṭ.

²⁴ Ó yà ká òyichi iyam iva mmá nəm atutul, mmá nyár, kaṭ te mmá zəp atutultutul ûYawe kaṭ. Ó yà ká nnəm nva ta ka ashe mbin wó kaṭ.

²⁵ Ko ka awó adyanəm ó yà ká òyichi apir iyam va ta wa iyam-nrì Ìnan wó kaṭ, kaḱul mmá vyap chit, oza ká mbyèt, mí kam oza ka anung wó kaṭ.>
>>

²⁶ UYawe là ûMusa pa,

²⁷ <<A yà pa mmá mar iya ìna ìnunggwan, ìnagam, kaṭ te ibèl ìnunggwan, te i təm ká ìnang wò nra pa nfangshat kang ká nra ngga nnanne te, mí kəkam wa iyam inana apər ûYawe.

²⁸ Kang ó pa ìna kaṭ te itam ká iyəyen n̄da nzəngtəng kaṭ.

29 <<A yà pà u yichi nləfər iyam ipápà iga adəngchi ûYawe te, yichi nləfər bu kà asal va mí kəkam kà anung bu.

30 Nkpak mí ri nda va ta, kang mmá re a chu ipin ikpakkpak kat. Mmami na uYawe.

31 <<Ó kpak oga nnap mpakpak mi, ó nak ishi ká oza. Mmami na uYawe.

32 Kang ó vyap adin mi ayéryər kat, kakul na n yà uyéryər kà ashe oIsarila. Mmami na uYawe uva gar wó,

33 uva fa ká wó kà ashe mbin aMasar pà ô yà Inan wó. Mmami na uYawe.>>

23

Ìlum inaknak oIsarila

1 UYawe là ûMusa pa,

2 <<Là nnàp ká oIsarila, là ôza pa, Oga ìlum inaknak àYawe omà ta, iva ó shet iyéryər iga mbut, ìlum mi inaknak.

3 <<O nəm inok kà apal ra pà nkpađing, kang ìlum iga ifangshat te, i yà ìlum aSati iga njul, ìlum iga mbut nyéryər. Kang ó nəm inok iro kat, kà nkpektak atak va ó təm kà, aSati aYawe.

4 <<Omà ta oga ìlum inaknak àYawe, oga mbut nyéryər, nva ó shet ká kà awalang oza anaknak.

Ìlum inaknak iga nggantal

(Nkung 28.16-25)

5 <<Kà nra ngga ngbapchi aman pà neding kà ape aga nggəshi ká arurong te, ìlum nggantal àYawe.

⁶ Kà nra ngga ngbapchi aman pa tukun ka ape va ta te nnəm nchang izər ìlum inaknak nzəngkəng ngga n̄yà ká anyer kaṭ ûYawe. Nra pa nfangshat ó yà ká nri nzəngkəng ngga n̄yà ká anyer kaṭ.

⁷ Kà nra nggəshi kà ìlum inaknak te ó nəm mbut n̄yéryər. Kang ó nəm inok wó iga nza nra nggo kaṭ.

⁸ Nra pa nfangshat ó yichi iyam inana iga apər ûYawe, mbut n̄yéryər i yà kà nra ngga nfangshat, ó nəm inok iga nza nra nggo kaṭ.>>

Ìlum inaknak iyam mbən gəshi

⁹ UYawe là ûMusa pa,

¹⁰ <<Là nnàp ôlsarila, là ôza pa, A yà pa ó tar mbin va mmami kà ngga nnəna á wó kang ó bən iyam-nr̄iri, te ó ba ká nsar ngga nggəshi ûnəm uga mpyal awop.

¹¹ Uza i yege nsar va ta kà mpyal àYawe kakul na mmá kam. Unəm uga mpyal awop i yege kà nkpan aSati.

¹² Kà ìlum va ó yege nsar va ta ká te, ó yichi inagam iga izun pa izəng iva yà ká mbyèt kaṭ kakul iyam inana iga nshì pa d̄wot ûYawe,

¹³ nzəng ká iyam inana ipir ikùr, mmaḱ n̄yalyal ikpáng pa iparəm mmá zuk mmì mpyet kà, iyam apər ûYawe inəngnəng ichángchàng, ká iyam inana iwawa akwaya pa zəng aga ndəng ibangbang.

¹⁴ Ó yà ká nr̄i nzəngkəng nro kaṭ te ipir ikùr ifórfòr kaṭ te izhakan kaṭ, ya nra va ó ba ká iyam inana Înan wó chit kang. N̄dyáng ngga mbyet

mbyet ka_kul oga nlwàk wó ka_nkpaktak atak va_ó tøm ka_.

¹⁵ <<Á bàn ka_nkpan aSati va_ó ba ka_ nsar ishi iyam inana iga òyege, te ó kung aSati pa_fangshat pa_súr.

¹⁶ Ó kung nra isøm pa_itukun á ga á chu nkpan aSati aga fangshat, nnà chit te ó yichi iyam inana ipir ikùr izhakan ûYawe ðak.

¹⁷ Ka_ atak va_ó tøm ka_ te, ó ba ka_ nzøngkøng mbìt pa_mparøm nva mmá nøm ká mmak òyalyal ikpáng pa_iparøm, mmá bit ká anyør, wa iyam inana iyegeyege iga awár aga nggøshi ûYawe.

¹⁸ Te ó yichi nzøng ká nzøngkøng va_ ta itam inunggwan iga izun pa_izøng pa_ifangshat, iva_yà ká mbyèt ka_, ká iya ina inunggwan pa_izøng, ká inagam pa_iparøm. Oza_i yà iyam inana iga nshì pa_ðwot ûYawe, nzøng ká iyam inana ipir ikùr oza_ ká oga iyam inana iwawa, iyam inana iga apør, inøngnøng ichángchàng ûYawe.

¹⁹ Yichi mbìt pa_nzøng kakul iyam inana nnap mbángbang kpa, ká inagam iga izun pa_izøng pa_iparøm, kakul nløfør iyam inana iga ntøm ikángkáng.

²⁰ Unøm uga mpyal awop i yege inagam iga iparøm va_ ta ka_mpyal àYawe wa iyam inana iga òyege nzøng ká nzøngkøng ngga awár aga nggøshi. Oza_i yà iyam inana iyøryør ûYawe kakul ánøm uga mpyal awop.

²¹ Ka_ilum izøngtøng va_ ta ó wór mbut, á yà mbut òyøryør á wó, kang ó nøm inok iga nza_nra nggo ka_. Nnà ta_i yà nnap mpakpak ngga mbyet mbyet ka_nkpaktak atak ntøm wó ka_ashe oga nlwàk wó.

22 <<Kang a yà pa ó bən iyam iga mbin wó te, kang ó bən anung iram wó kaṭ, kaṭ te ó chák nvaṅg iyam mbən wó va tàk kà mbin kaṭ. Ó re oza kakul onəm oga nkun kà oḍyanəm. Mmami na uYawe, Inan wó.>>

Ìlum inaknak iga izun ipipe
(Nkung 29.1-6)

23 UYawe là ûMusa pa,

24 <<Là ôlsarila pa, Kà nra ngga nggəshi ka ape aga afangshat, te ó nak ishi kà aSati njul, mbut ñyéryər nva mí nəm kà iyam ibúrbúr.

25 Kang ó nəm inok iga nza nra nggo kaṭ, nnyi te ó yichi iyam inana iga apər ûYawe.>>

Ìlum iga mmwa ishi
(Nkung 29.7-11)

26 UYawe là ûMusa pa,

27 <<Nra ngga ngbapchi ngga ape aga afangshat va ta, nra ngga mmwa ishi. Á yà mbut ñyéryər á wó, ó dang ishi wó kà iyam-nrì, kang ó yichi iyam inana iga apər ûYawe.

28 Kang ó nəm inok iro n̄da va ta kaṭ, kakul nra ngga mmwa ishi nva mí nəm mmwa ishi kà kakul wó kà mpyal àYawe, Inan wó.

29 Nza unəm nggo va dang ishi wò kà iyam-nrì kà ìlum va ta kaṭ te, mí fa kà na ka ashe onənəm.

30 Kang nza unəm nggo va nəm inok kà ìlum va ta te, mi zhì na ka ashe onənəm.

31 Kang ó nəm inok iro kaṭ. Iva ta na ndyang ngga mbyet mbyet kakul oga nlwàk wó kà nkpak-tak atak va ó təm kà.

³² ASati aga njul kakul wó, te ó dang ishi wó ká iyam-nrì, bàn ká arurong aga nra ngga nfangzəngtəng ngga ape i ga i chu arurong aga ipin ikpakkpak, ó nak ishi ká aSati wó.>>

*Ìlum Inaknak iga Aghal
(Nkung 29.12-40)*

³³ UYawe là ûMusa pa,

³⁴ <<Là ôlsarila pa, Kà nra ngga ngbapchi aman pa tukun ka ape aga afangshat te, nnəm nchang izər ìlum Inaknak ngga Aghal ûYawe, nva i yar nra pa nfangshat.

³⁵ Kà nra nggəshi te ó nəm mbut nyéryər, kang ó nəm inok wó iga nza nra nggo kat.

³⁶ Ka apal nra pa nfangshat ó yichi iyam inana apər ûYawe, kang nra ngga nnanne te i yà mbut nyéryər á wó, te ó yichi iyam inana iyam apər ûYawe. Ìlum ichumchum iga awop, kang ó nəm inok wó iga nza nra nggo kat.

³⁷ <<Oga ilum inaknak va ta uYawe nak, iva ó shet ká wa oga mbut nyéryər kakul nyichi iyam inana apər ûYawe, iyam inana iga nshì pa dwot, iyam inana ipir ikùr, ká nləfər iyam inana iyam nkang, ká iyam inana iwawa. Nza ìlum inaknak nggo ká ilum iga nchang izər wò,

³⁸ oga ilum inaknak va ta nna yà iro ka apal aSati áYawe ká oga iyam inana wó, nkpaktak oga iyam inana nsar nnap-nlà wó, ká nkpaktak oga iyam inana iga ndòm igwak wó va ó na ûYawe.

³⁹ <<Kà nra ngga agbapchi aman pa tukun ka ape aga afangshat, nvangva ó bən iyam iga mbin chit, te ó nəm nchang izər ìlum Inaknak iga Aghal

ûYawe nva i yar nra pa nfangshat. Mí nēm njul kà nkpaktak ìlum iga nggəshi kang njul kà nkpaktak ìlum iga inanne kpa.

⁴⁰ Kà ìlum iga nggəshi te ó wur kakul ishi wó awár ikún inənan, agwal akulom, oga igwong iga agwal ikun pa zhəkhək, kang ó nēm nchang igwak kà mpyal àYawe, Inan wó nra pa nfangshat.

⁴¹ Ó nēm nchang izər ìlum inaknak ûYawe nra pa nfangshat kà ashe izun. Ndyáng ngga mbyet mbyet kakul oga nlwàk wó, kang ó nēm nchang izər kà ape aga afangshat.

⁴² Ó tēm kà ashe oga aghal nra pa nfangshat. Nkpaktak ovan omarmar oIsarila i tēm kà ashe oga aghal,

⁴³ kakul na oga nlwàk wó á nyi pa n nak oIsarila tēm kà ashe oga aghal, nvəng nva n fa ká oza kà ashe mbin oga aMasar. Mmami na uYawe, Inan wó.>>

⁴⁴ Kà asal va ta uMusa shet oga ìlum inaknak àYawe ôIsarila.

24

Nnak ishi ká apitila

(Nfa 27.20-21)

¹ UYawe là ûMusa pa,

² <<Nak oIsarila á ba ká mmì mpyet á bu nva mmá kam nnənan kakul na apitila á sàl pa dəkər.

³ UHaruna i chwong oza kà nsəm atani kà mpyal akwati aga nsar nnap-nlà kà ashe Aghal Mbut, i bən ká arurong i ga i chu ntàn atak kà mpyal àYawe pa dəkər. Ndyáng ngga mbyet mbyet kakul oga nlwàk wó.

4 Uza i nak ishi ká oga apitila va ka apal idari azənariya anənan kà mpyal àYawe pa dəkər.

5 <<Kpak mmaḱ nnənan fòr nzəngkəng ká pa ngbapchi aman pa parəm, nza mbìt nggo mmá nəm na ká mmaḱ ikpáng pa iparəm.

6 Dàt oza nzhi pa mparəm nza nzhi nggo ká nzəngkəng pa nkpaḍing ka apal atebəl aga azənariya kà mpyal àYawe.

7 Nak njəng nnəngnəng nchángchàng kà nza nzhi nggo, na á yà ka adər nzəngkəng, wa iyam inana apər ũYawe.

8 Uza i dàt nzəngkəng va ta kà mpyal àYawe nza aSati nggo, ka anung oIsarila. Nsar nnap-nlà mbyet mbyet.

9 I yà jì áHaruna ká ovəvan onunggwan, oza i ri ka Atak Ayéryər, kakul iyéryər va ji pa kpaktak ka ashe iyam inana apər ũYawe. Nnap mpakpak ngga mbyet mbyet.>>

Mpyat akat ka apal anəm uga mpwat adin Inan

10 Uyen ununggwan uro wa yà unənanng uyen oga aIsarila kang upupo unəm oga aMasar á fa ga ashe oIsarila, te ikum fa uya àyen uchar oIsarila va ta ká unəm oIsarila ka ashe apak.

11 Uyen àchar va ta sòng anung pwat adin Inan, te oza ba ká na ka atak áMusa. Adin anənanng pa uShelomit uyen àDibəri ka akum áDan.

12 Oza kùk na pa ná ó fe iyam va uYawe i là ôza pa na o nəm ká na.

13 Te uYawe là ũMusa pa,

14 <<Fa ká unəm va pwat mpwat kà nsəm apak, na nkpaktak onəm va fe na á nak awó oza ka

ishíshi na mmà nnyi pa_ uza_ nēm mpat va_ ta nēm,
na nkpaktak mbut á kwan na ká_ ipáng uza_ á kú.

¹⁵ Te là ôlsarila pa, a yà pa_ unēm a pwat Inan
wò te, uza_ i yar nsur mpat wò.

¹⁶ Nza_ unēm nggo va vyap adin aYawe te mí
gbal_ na. Nkpaktak mbut i kwan na ká_ ipáng,
udyanēm ka_ te uyen uga mbin, a yà pa_ uza_ vyap
adin va_ ta te, mí gbal_ na.

¹⁷ <<A yà pa_ unēm gbal_ unēmləbər te, nkpak
mí gbal_ na.

¹⁸ Nza_ unēm nggo va gbal_ iyam nkang áwan wò
te, uza_ i mwa akəkat, iriri kakul iriri.

¹⁹ A yà pa_ unēm nak abang uwan wò te, mí nēm
á na wa nva uza_ nēm,

²⁰ mbəkchi ka_ anung mbəkchi, iwú ka_ anung
iwú, ìnyin ka_ anung ìnyin, wa nva uza_ nak abáng
ûnēmləbər te, wa nnà ta mí nēm á na kpa.

²¹ Nza_ unēm nggo va gbal_ iyam nkang te, uza_
i mwa akəkat, kang unēm va_ gbal_ unēmləbər te,
mí gbal_ na.

²² Ó yà ká_ nnap mpakpak pa_ nzəng kakul
áďyanēm ká_ uyen uga mbin. Mmami na uYawe,
Inan wó.>>

²³ Nvangva_ uMusa là ôlsarila, te oza_ fa ká_ unēm
va pwat mpwat kà_ nsəm apak kang oza_ kwan na
ká_ ipáng. AIsarila nēm wa nva uYawe nak ûMusa.

25

Ìzun iga njul

(Ndan NM 15.1-11)

¹ UYawe là nnàp ká_ uMusa ka_ apal aBam
aSinayi pa,

² <<Là nnàp ká oIsarila, là ôza pa, Awalang va ó táng ashe mbin va mmami kà ngga nnəna á wó te, mbin va ta i nak ishi ká njul aSati ũYawe.

³ Ó suk iram wó ìzun pa ìkpāding, kang ó gbar iram ìbāngbāng wó ìzun pa ìkpāding, kang ó but awúwar.

⁴ Kang kà ìzun iga ìfangshat te, i yà aSati aga njul mbin, aSati ũYawe. Kang ó suk iram wó, kat te ó gbar iram ìbāngbāng wó kat.

⁵ Ó yà ká mbən iyām va fa ká ishi wò ká ashe iram wó kat, kang ó páng awár ìbāngbāng va fa ká ishi wò kat. I yà ìzun iga njul mbin va ta.

⁶ Nkpaktak iyām i va mbin ná kà ìzun aSati aga njul te, i yà iyām-nrì kakul wó, kakul bu, uzwal bu unungwan kat te uchar, ká unəm va u yar ká inok, kat te uđyanəm uva ká ntəm ká bu,

⁷ kakul iyām nkang ká izhé iga anyin va ká mbin bu. Nkpaktak iyām va mbin i na te i yà iyām-nrì.>>

Nchang izər iga ìzun ìsəm pa ìtukun

⁸ <<Te bu kung ìzun iga njul aSati pa ñfangshat, ufangshat ká apal ìzun pa ìfangshat, kakul na nra aSati pa fangshat nvaṅ pa ñfangshat á yà ìzun ìsəm nedíng aman pa fangzəngtəng.

⁹ Te bu bur agbəshì pa gbāngbāng kà nra ngga ngbapchi ká ape aga afangshat. Kà nra ngga Mmwa Ishi te, bur agbəshì ká ashe nkpaktak mbin bu.

¹⁰ Te ó gòr ìzun iga ìsəm pa ìtukun kang ó shet ká ñfən ká ashe mbin kakul nkpaktak onəm oga ntəm ká ashishe. Kà ìzun i va ta mí le ká nkpaktak

iyam ádango á na, i yà ìzun iga nfən, kang nza uzəngtəng wó nggo i le atak akum wò.

¹¹ Ìzun iga isəm pa itukun i yà iga nfən á wó. Ó suk iyam kat, ó bən iyam va fa ká ishi wò kat, kat te ó páng awár ibəngbəng va nəm ká ishi wò kat.

¹² I yà iyéryər ka atak wó, kakul i yà ìzun iga nfən. Ó ri iyam va mmá ya ka ashe ìram.

¹³ <<Ka ashe ìzun iga nfən va ta te, nza uzəngtəng wó nggo i le atak iyam wò.

¹⁴ <<A yà pa u yáp ká iyam ũwan bu, kat te u yáp iyam ka uwan bu te, kang ó mwar owan wó kat.

¹⁵ A yà pa u yáp iyap ka uwan bu te, i yà ka apal nyél ìzun iga nvəng ìzun iga nfən. Uza i yáp ká á bu ka apal iyəl ìzun iga mbən iyam.

¹⁶ Mmak mbubwai i mál ká mmak ìzun, kang nyen mbubwai i mál ká nyen ìzun, kakul uza ka nyáp ká á bu ka apal nyél ìzun i va bu wap ìram va ta.

¹⁷ Kang ó mwar owan wó kat, ó nəm ayər Inan wó, kakul mmami na uYawe, Inan wó.

¹⁸ <<Ó kpak oga ndyáng mi ká oga nnap mpak-pak mi, ó nak ishi ká oza, na ó təm ka ashe mbin va ta ká ikánkáng.

¹⁹ Te mbin i na awár wò, ó ri i yél afu á wó, kang ó təm ká ikánkáng ka ashishe.

²⁰ A yà pa ó bəp pa, <<Iza í ri ka ìzun iga ifangshat, a yà pa í suk kat, kat te í but iyam mbən yi kat yà?>>

²¹ Te mi nak nnap nnənan mi á wó ka ashe ìzun iga ikpəding, na mbin nva ta á na iyam-nrì pa makmak ngga ìzun pa iparəm.

22 A yà pà ó suk iyam kà ìzun iga ìnanne te, ó yà kà nrí kà ashe iyam mbèn ikpàn i ga i chu ìzun iga ìfangzəngtəng, ya iyam mbèn izhakan i nəm kang.

23 <<Mí yáp ká mbin mbyet mbyet kaṭ, kakul njem, kang mmawó oḍyanəm oga ntəm ndàtdàt ká mi.

24 Kà ashe nkpaktak oga mpwom wó te, ó nak asal va mí le ká mbin va ta.

25 <<A yà pà ugənanang bu kun ga mà bàk kang à yáp ká iyam wò iro kà ashe iyəyam, te unənal uga ndátkulung ká na i ba i mwa iyam va ugənanggənanang yáp ká.

26 A yà pà unəm va ta yà ká unal uga mmumwa á na kaṭ, kang uza wong yà ká iyam iga mmumwa íshi wò,

27 te uza i kung mmak ìzun va mmá yáp ká, uza i le ká abo mbwai ũnəm va uza yáp ká á na, te iyəyam i le á na.

28 Kang a yà pà uza yà ká iyam iga mmumwa kaṭ te, iyam va uza yáp ká te i təm kà awó ánəm uga ñiyap i ga i chu ìzun iga nfən. Mí le ká kà ìzun iga nfən, te uza i le ká iyam wò.

29 <<A yà pà unəm yáp ká nzhi nra wò kà ashe ìtong iga akamsəlang, te i lile kà, kà ìzun va uza yáp ká. Nra ngga mmumwa na ta.

30 A yà pà uza mwa kà ashe ìzun iga ìzəng va ta kaṭ, te nzhi ngga ashe ìtong iga akamsəlang va ta i yà nji ànəm va yáp kà nkpaktak nlùlwak mbyet mbyet. Mí yà ká nle ká kà ìzun iga nfən kaṭ.

31 Kang a yà pà oga nzhi kà ivan ìtong va akamsəlang gáng oza kaṭ, te mí kung oza nzəng ká agbagba mbin. Mí le ká oza le ká ìzun iga nfən.

³² <<Kà ìtong oLawi te, oLawi òma à yà ká atak nsat ngga mbyet mbyet pa ó le ká nzhí nji oza va kà ashe itong oza.

³³ Nza iyam kà ashe oLawi nggo te mí lile ká, Nzhi va mmá yáp ká kà ashe itong va iji oza te, mí le ká kà ìzun iga nfən, kakul nzhi va kà ashe itong oLawi te nji oza kà ashe oIsarila.

³⁴ Kang atak nkpak iyam nkang aga itong oza te mí yáp ká kat, kakul aji oza mbyet mbyet.

Nna akát onəm oga nkun

³⁵ <<A yà pa ugənanang bu kun ga mà bàk va i kamshi ishi wò kà ashe wó kat, te ó təp na wa nva ó təp uɖyanəm uga ntəm kà ashe wó, kang uza i təm ká wó.

³⁶ Kang wa akát ká nram mmák kat te nkak kà apəpal kà na kat. Te wa nəm ayər Inan bu, kang ugənanang bu i təm ká bu.

³⁷ Kang wa na akát mbwai á na ká nram mmák kà, kat te wa yáp ká iyam-nrì bu á na ká nram nkak kà apəpal kat.

³⁸ Mmami na uYawe, Inan wó, uva fa ká wó kà mbin aMasar na í na mbin aKananá á wó, na í yà Inan wó.

³⁹ <<A yà pa ugənanang bu ká bu kang à kun, te yáp ká ishi wò á bu, te kang wa nak na á nəm inok á bu wa ázwal kat.

⁴⁰ Uza á təm ká bu wa ánəm uga ñyar kà inok kat te uga ntəm ndàtdàt, uza i nəm inok á bu i ga i chu Ìzun iga Nfən.

⁴¹ Te uza ká ovan wò i fa kà atak bu, kang uza i le atak akum wò kà atak iyam ópo wò.

⁴² Ka_kul oza_okpari mi, ova n fa ka_oza ka_mbin aMasar, kang mmá yáp ka_oza wa ñyáp ka_ozwal kať.

⁴³ Kang wa nēm ichumchum isaisai ka_apal oza kať, te nēm ayər Inan bu.

⁴⁴ <<Ozwal bu onungwan ka_ochar va i ya oji bu te, á ya ka_mbin va gáng wó, ó yáp ozwal ka atak oza.

⁴⁵ Ó yáp ozwal yáp ka_ashe ovan oďyanēm va ka_ntēm ka_wó, ka_ashe akum oza va ka_ntēm ka_ashe wó kpa. Ova oza_mar ka_ashe mbin wó, kang oza i ya iyam wó.

⁴⁶ Ó wur oza á ya iyam akup ovan wó va ka_nvang wó mbyet mbyet. Ó nēm inok nēm ka_oza wa ozwal. Owan wó oIsarila ji wò te, kang unēm a nēm ichumchum isaisai ũwan wò kať.

⁴⁷ <<A ya pa_ uďyanēm ka_ashe wó dur, kang ugənanğ bu wong kun ga mà bàk ka_atətak kang à yáp ka_ishi wò ũďyanēm va ka_ntēm ka_ashe wó, kať te unēm uga akum áďyanēm va ta,

⁴⁸ ka_nvang ñyáp ka_ishi wò te uwa à ya ka_atak nsat ngga nkam ishíshi. Uzəngtəng ka_ashe ogənanğənanğ i kam ishíshi kam.

⁴⁹ Ukikyan kať te uya àkikyan unungwan kať te unēm uro ka_ashe onənal uga ndátkulung ka_ashe akukum i mwa ishíshi. A ya pa_uza wong dur te uza i mwa ishi wò.

⁵⁰ Uza i kung nzəng ka_unēm va yáp na, iyəl izun va uza yáp ka_ishi wò á na i ga i chu İzun iga Nfən. Mbwai iyəyap i mál ka_mbwai inok ánəm uga ñyar ka_inok ka_ashe izun va ta.

⁵¹ A yà pà nna à òur izun pà makmak, te uza i mwa mbwai nkam ishi wò i màl ká mbwai va mmá ka yáp na ká.

⁵² Kang a yà pà òur izun pà òap i chu Ìzun iga Nfən, te uza i kung kang i mwa mbwai ngga nkam ishi wò i màl ká aòo izun.

⁵³ Uza i tøm ká unøm va yáp na wa ánøm va mmá yar ka inok ìzun, ìzun. Uðyanøm va yáp na te i yà ká nnøm ichumchum isaisai á na ka.

⁵⁴ <<A yà pà mmá kam ishíshi ka asal ro ka ashe oga ava ta ka, te uza ká ovan wò mí re oza i ga ka ashe Ìzun iga Nfən.

⁵⁵ Ka kul oIsarila okpari mi. O va n fa ká oza ká mbin aMasar. Mmami na uYawe, Inan wó.>>

26

Nnap nnənan kakul nkpak nnap nnəm (Ndan NM 7.12-24; 28.1-14)

¹ UYawe là pa, <<Kang ó nøm ichər kakul ishi wó ka te alakan akpákpà, ka te ndar nyéryər kakul ishi wó ka te ipáng ikpákpà ká mbin wó pa ó kúchì á na, kakul mmami na uYawe, Inan wó.

² Ó kpak ilum aSati mi kang ô rup ká atak awop mi. Mmami na uYawe.

³ <<A yà pà ó kpak oga ndyáng mi kang ó nak ishi ká oga nnap mpakpak mi ó nøm inok ká oza,

⁴ te mi re nrè ká ìvar ka awalang va màl, na mbin i na iyam-nrì, kang oga ikún iga ashe iram i na awár oza.

⁵ Mpək iyam wó i ga i chu awalang aga mpáng ibangbang, kang mpáng ibangbang i ga i chu awalang aga nsuk iyam, te ó yà ká iyam-nrì pa

makmak pa_ó ri kang ó tēm ká_ikángkáng ka_ashe mbin wó.

⁶ <<Mi na ntēm ikángkáng kà mbin, kang ó ra ká_iyam iro i gbæk wó kat. Mi fa ká_izhé íbángbàng ka_ashe mbin, kang ndokchì i yà ká_nwatar ka_ashe mbin wó kat.

⁷ Ó bàk onēm ìkum wó kang oza_i tàk kà_mpyal wó ka_atak ndokchì.

⁸ Pa_otukun ka_ashe wó i bàk ìgbal, kang ìgbal ka_ashe wó i bàk ìkalong pa_ìgbapchì, kang okpa ìkum wó i tàk kà_mpyal wó ka_atak ndokchì.

⁹ <<Mi nak nnap nēnan_á wó, mi nak wó ó myak ó yēl, kang mi kpan nsar nnap-nlà mi ká_wó.

¹⁰ Ó ri iyam ikpan_iva mmá but chit gbàng, kang ó wur ikpan_vā ta i fa na á le ká_atak ìzhakan.

¹¹ Mi nak atak ntēm mi ka_ashe Aghal ayéryer ka_ashe wó, kang mi yà ká_nyang ká_wó kat.

¹² Mi chen kà_ishimshe wó kang mi yà Inan wó, kang ó yà onēm mi.

¹³ Mmami na uYawe, Inan wó, uva_fa ká_wó kà_mbin aMasar, na kang ó yà ozwal oza_lap kat, kang n cwan ndar ayok wó na á nak wó ó nēm ntēm ngga akul ishi wó.

*Mpyat akát kakul nkpak nnap nnēm kat
(Ndan NM 28.15-68)*

¹⁴ <<A yà pa_ó kpak nnap nnēm á mi kat, kang ó nak ishi ká_nkpaktak oga nnap mpakpak vā ta kat,

¹⁵ kang a yà pa_ó yang ká_oga ndýáng mi kang ó yen ká_oga nnap nkpakkpak mi, o nak ishi ká_nkpaktak oga nnap mpakpak kat, kang o bækchi nsar nnap-nlà mi ká_wó,

¹⁶ te iyam va ta mi nəm á wó, mi ba ká mbək anung nnga nnəm ayər ka ashe wó, ká arwa aga nyà ká ntán kaṭ, arwa atak rusok ava i nak iwú wó i fo kang ó yà onəm onənən kaṭ. Ó suk iyam nsuk ka anung amwang, kakul okpa ikum wó i ga nriri.

¹⁷ Mi nak iwú mi ka apal wó, kang okpa ikum wó i nəm igwan ká wó. Onəm oga nyáng wó i nəm igwan ká wó. Onəm oga nyáng wó i nəm ichumchum ká wó, kang ó chəng nchəng va unəm uro kà nwà wó kaṭ.

¹⁸ <<A yà pa kà nvəng oga iyam va ta kang ó kpak nnap nnəm á mi kaṭ te, mi nyám ntàn á wó nvəng pa nfangshat kakul nnap mbángbəng wó.

¹⁹ Mi chwan nkak ishi wó ngga nkədyar kang mi nak ivər ipəng kaṭ, kang mbin wó i wom i yà wa acham.

²⁰ Ikam wó i kùr ka iyam ilakchi. Kakul mbin wó i na iyam-nrì wò kaṭ, kang oga ikún iga mbin wó i na awár oza kaṭ.

²¹ <<Kang a yà pa ó dap ká mi kang ó yang ká nkpak nnap nnəm á mi, te mi nak oga mbək anung wó i mak nvəng pa nfangshat kakul oga nnap mbángbəng wó.

²² Mi re nrè ká izhé iga anyin ka ashe wó, iva i gbəng ovan wó, i vyap iyam nkang wó, kang i nak iyəl wó i yen i ga i chu iva i nak mí chəng oga asal wó.

²³ <<Kang a yà pa káp ká oga iyam va ta, te ó kam ndyang ntàn mi kaṭ, ó ga mpyal ká nnəm nkak ishi ká mi,

²⁴ te mi pyat á wó, kang mi mbək anung á wó nvəng pa nfangshat kakul nnap mbángbəng wó.

25 Te mi ba ká ndokchì ngga mpyát akat mbækchi nsar nnap-nlà, kang ó but kà oga itong wó te, mi re nrè ká arwa kà ìshimshe wó, kang mí na wó kà ashe awó onəm ìkum wó.

26 Nvang va n gəl asal iyam-nrì wó te, ochar pa ogbapchi i pək nzəngkəng wó kà ashe achər apər aga nwàng iyam pa ìzəng, kang oza i ba ká nzəngkəng kà atak mmàl ìdək, ó ri kang i kúr wó kət.

27 <<Kang a yà pa káp ká iyam va ta, ó kpak nnap nñəm á mi kət, ó nəm nkak ishi á mi,

28 te mi pyat á wó kà ashe nlak ìgwak ìbàngbàng, kang mi nyám ntàn á wó nvàng pa nfangshat iji mmatmat ji kà apal oga nnap mbàngbàng wó.

29 Ó ri izhé ovan wó onungwan ká izhé ovan wó ochar.

30 Mi chwan oga atak awop wó, mi kyen oga atak ndung nturari wó, kang mi but oga akúm wó kà apal oga ichər wó, mi yang ká wó.

31 Mi nak oga itong wó i təm agúng kang mi vyap oga atak awop wó. Mi yà ká kam iyam inana wó kət.

32 Mmami ká ishi mi mi vyap mbin wó, na okpa ìkum wó va i ba ntəm kà te oza á gam.

33 Te mi tur ndokchì kà wó, kang mi lyangshin wó kà ashe mbin. Mbin wó i təm nkpələng, kang oga itong wó i ra agúng.

34 Kang mbin i fe nchang aSati izún wò aga njul kà nkpaktak awalang va á ra nkpələng, nva nna kà ó yà kà ashe mbin onəm ìkum wó á.

35 Nkpaktak awalang va ra nkpələng te i ya njul nva uza kà yà kət, kà nra oga aSati wó, nva kà ó

yà kà ntəm kà ashishe.

³⁶ <<Abo oro va le kà ashe wó te, mi nak ayər kà ashe igwak oza kà ashe mbin onəm ikum oza. Nnáp agwal azang i nak oza kà nchəng. Oza i chəng wa nchəng ndokchì, kang oza i tàk, káp ká nva unəm uro kà mbàk oza kàt.

³⁷ Káp kà nva pa unəm uro kà mbàk oza kàt, oza i nəm ifang kà apal owan oza wa nchəng ndokchì. Kang ó yà ká ikam iga ntong kà mpyal okpa ikum wó kàt.

³⁸ Ó zhì kà ashe mbín, mbin onəm ikum wó i mang wó.

³⁹ Abo oro va le kà ashe wó te, oza i kú kà mbin okpa ikum oza kakul nnap mbángbang oza. Kang oza i kú kakul nnap mbángbang opo oza.

⁴⁰ <<Kang a yà pa oza i pwa nnap mbángbang oza ká nnap mbángbang opo oza, nlang nnandər oza va oza nəm á mi, ká nkak ishi va oza nəm á mi kpa,

⁴¹ nva nak mi n pyat oza kpa kang n ba ká oza kà ashe mbin okpa ikum oza, te awalang va oza yen ká ishi oza kang à man ká nnap mbángbang oza,

⁴² te mi rəng nsar nnap-nlà mi ká uYakup. Mi rəng nsar nnap-nlà mi ká uIshaku kpa ká nsar nnap-nlà mi ká uAbəraham. Mi rəng ká mbin va ta.

⁴³ Kang oza i yang ká mbin i re, te i ya njul oga aSati wò nva uža ra ikpələng, kang oza man ká imwa nnyám ntàn nnap mbángbang oza, kakul oza yang oga nnap mpakpak mi kang oza jan oga ndyáng mi.

⁴⁴ Káp ká nnà te, kà awalang vā oza kà ashe mbin okpa ìkum oza te, mi yang ká oza kà kang mi nzhì oza pā chatchat kà, kang mi bākchi nsar nnap-nlā mi ká oza kà, kakul mmami na uYawe, Inan oza.

⁴⁵ Kakul oza te, mi rəng kà nsar nnap-nlā vā ká opo oza, ova n fa ká kà mbin aMasar kà ìwú mbín pā n yà Inan oza. Mmami na uYawe.>>

⁴⁶ Oga ndyáng, nnap nkpakpak, ká oga nnap mpakpak va tā uYawe pak kà ishimshe wò ká oIsarila kà apal abam aSinayi kà atak áMusa.

27

Nnap mpakpak kà apal nsar nnap-nlā

¹ UYawe là nnàp ká uMusa pā,

² <<Là nnàp ká oIsarila, là ôza pā, a yà pā unəm uro yar nsar nnap-nlā ūYawe pā o na unəm te uza i mwa ishishi kà atak mmak mbwai vā tā,

³ te mmak iyām vā tā kà apal ánunggwan, á bān kà ìzun ìsəm pā ìparəm ga chu ìsəm pā ìkpāding te, mməmak i yà mbwai ashekel azurfa ìsəm pā ìtukun kà anung ashekel aga Atak Ayéryər.

⁴ Kang a yà pā uchar te, mmak mbwai ashekel azurfa i yà ìsəm pā ishatding.

⁵ A yà pā uyen uga ìzun pā ìtukun ga chu ìsəm pā ìparəm te, mmak mbubwai i yà ashekel azurfa ìsəm pā ìparəm kakul ánunggwan kang ashekel azurfa pā gbaḗchi kakul áchar.

⁶ A yà pā uyen uga ape pā zəng ga chu ìzun pā ìtukun te, mmak mbwai kakul ánunggwan i yà ashekel azurfa pā tukun, kang kakul áchar i yà ashekel azurfa pā shatding.

⁷ A yà pà unəm uga ìzun ìsəm pà ìkpāding kaṭ te á jiji te, mmak mbwai i yà ashekel azurfa pà gbapchi aman pà tukun kakul ánungwan, kang ashekel azurfa pà gbapchi kakul áchar.

⁸ Kang a yà pà unəm vā kà nyar nsar nnap-nlā kang à kun ngga nva pà á mwa mbubwai kaṭ te, uza i ba ká unəm vā ta kà mpyal ànəm uga mpyal awop kang unəm uga mpyal awop i nak mmak mbubwai ka atak nkām ànəm uga nyar nsar nnap-nlā.

⁹ <<A yà pà nyar nsar nnap-nlā ka apal iyām nkang vā mí yichi wa iyām inana ũYawe te, nkpaktak iyām vā mí na te i yà iji aYawe.

¹⁰ Uza i gaban, kaṭ te i pal ká iro kaṭ, ko inənan kakul íbángbāng, kaṭ te íbángbāng kakul inənan. Kang a yà pà uza i pal iyām nkang ká iyām nkang, te nkpaktak oza, ívā mmá pal ká ívā mmá pal iwuwān ká i yà iji aYawe.

¹¹ A yà pà nyar nsar nnap-nlā ka apal iyām nkang iga adak ívā māl pà mmá yichi wa iyām inana ũYawe kaṭ, te mmá ga ká iyām nkang vā ta kà mpyal ànəm uga mpyal awop.

¹² Unəm uga mpyal awop i nak mmak mbubwai, ka atak mbíbyen kaṭ te mbəbāng, wa nva unəm uga mpyal awop nak mbubwai te, i yà wa nnà ta.

¹³ Kang a yà pà uza dóm mmwa ishíshi te, i nak uzəng ka apal atukun uga mmak mbubwai kà.

¹⁴ <<A yà pà unəm gòr nzhi wò təm ñyéryər ũYawe, te unəm uga mpyal awop i nak mmak mbubwai, ka atak mbíbyen kaṭ te mbəbāng, wa nva unəm uga mpyal awop nak te, i yà wa nnà ta.

15 Kang a yà pà unəm va gar nzhi wò pà ô kam ishíshi te, uza i nak uzəng ka apal atukun uga mmak mbubwai, te i yà njini.

16 <<A yà pà unəm gar ìram ìro va ijini ûYawe te, mmak mbubwai i mál dakdak ká apír aga nsusuk, ka apal mbwai ashekel azurfa isəm pà itukun ka anung apir ibəshi kà ikpáng iga mma iyəm.

17 A yà pà uza gar ìram va ta kà ìzun iga nfən te, mbubwai i təm wa nva mmá nak.

18 Kang a yà pà uza gar ìram va ta kà nvəng ìzun iga nfən, te unəm uga mpyal awop i kung mmak mbubwai i mál dakdak ká oga izun va bur i ga i chu ìzun iga nfən, kang mí kpak i le.

19 A yà pà unəm va gar ìram va ta á wong dòm pa ômwa ishíshi te, uza i nak uzəng ka apal atukun uga mmak mbubwai, te ìram va ta i le i yà ijini.

20 Kang a yà pà uza mwa ishi ìram va ta kat, uza yáp ká ûnəm uro te, mí mwa ishíshi lap kat.

21 A yà pà mmá le ká ìram va ta kà ìzun iga nfən te, i yà iji aYawe, i təm iji onəm oga mpyal awop.

22 <<A yà pà unəm gar ìram ûYawe ìva uza yiyáp ka ashe mpupwom kat,

23 te unəm uga mpyal awop i kung mbubwai á na i ga i chu ìzun iga nfən, kang unəm va ta i mwa mbwai nda va ta mbwai va ta nji aYawe.

24 Kà ìzun iga nfən te ìram i le i yà iji ànəm va uza yáp ka atətak, uva ka yà upo ìram á.

25 Nkpaktak oga nnak mmak amwa bu á mál ká ashekel aga atak awop, agera isəm pà iparəm ka anung ashekel.

26 <<Kang unəm uro a gar amar aga nggəshi ûYawe aga iyəm nkang, ka ashe ina kat te itam

kaṭ, kaḱul amar aga nggəshi yà chit aji aYawe.

²⁷ Kang a yà pa izəngtəng ka ashe iyaṃ nkang iga adak te, uza i mwa ishíshi wa mmak nnak mbubwai ka atak nnak uzəng ka apal atukun uga mmak mbubwai. A yà pa mmá mwa ishíshi kaṭ te, mí yáp ká ka apal mmak mbubwai.

²⁸ <<Ká nnà te, iyaṃ iro yà iva mí yáp ká kaṭ, iva unəm gar chit mbyet ũYawe ka ashe nkpaṭtak iyaṃ va ijini. Unəmləbər kaṭ te iyaṃ nkang, kaṭ te mpom, mí mwa ishíshi kaṭ te mí yáp ká kaṭ. Nkpaktak iyaṃ va mmá gar te i yà inənan iji aYawe.

²⁹ <<Unəmləbər uro yà uva mmá gar chit kaḱul nzhì mí mwa ishíshi kaṭ, mí gbaḷ na.

³⁰ <<Nza uzəng ka ashe agbapchi nggo iga iyaṃ-nrì wó iga ashe iram, ipir ikùr kà mbin kaṭ te awár ikún te, iji aYawe.

³¹ A yà pa unəm dòm pa ô mwa ishi uzəng ka ashe agbapchi wò uro, te uza i nak uzəng ka apal atukun uga mməmak kà.

³² Nza uzəng ka apal agbapchi iyaṃ nkang nggo te, ija aYawe. Awalang va mmá kung iyaṃ nkang te, iga igbapchi iji aYawe.

³³ Uza i yà ka ndədər pa ô van ibyenbyen ká ibángbang kaṭ, kang uza i yà ká mpəpal kaṭ. A yà pa uza i pal te, iva mmá pal ká iva mmá pal iwuwan ká i yà iji aYawe, mí mwa ishishi kaṭ.>>

³⁴ Oga nnap mpakpak va ta uYawe nak ũMusa kaḱul oIsarila ka apal abam aSinayi.

Tarok Bible

The Holy Bible in the Tarok language of Nigeria

copyright © 2024 Luke Initiative for Scripture Translation

Language: (Tarok)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

501af3c5-12fd-5965-ade7-9600b2d02717